



Broj: 01/1-02-1895/13
Ilijaš, 31. 10. 2013. godine

ZAPISNIK

sa 12. (dvanaeste) sjednice Općinskog vijeća Ilijaš održane dana 31. 10. 2013. godine, sa početkom u 10h.

Dvanaestom sjednicom OV-a Ilijaš predsjedavao je predsjedavajući OV-a g-din Damir Filipović.

RB.	IME I PREZIME
SDA	
1	MAHIR DEVIĆ
2	NEDIM MATORUGA
3	SAUDIN DURMIĆ
4	HALID DIZDAREVIĆ
5	AMAR DOVADŽIJA
6	MUAMER DERVIŠEVIĆ
7	FAHIR HASANOVIĆ
8	RASIM ŠEHIĆ
9	SELMA PUŠINA
SDP	
10	ALAN ŠERAK
11	MARIONETA ILIĆ-JURETA
12	DAMIR FILIPOVIĆ
13	SELVER HERIĆ
SBB	
14	ADEM EFENDIĆ
15	NIJAZ MAŠIĆ
16	SEAD ŠEHIĆ
17	AKIF BEŠLIJA
SAMOSTALNI VIJEĆNICI	
18	EDHEM HASANOVIĆ
19	-
STRANKA ZA SREDNJE	
20	BESIM GLJIVA
21	AIDA MALIŠEVIĆ
LDS	
22	NIJAZ RASTODER
23	NIHAD BUČUK

	BPS
24	MUHAMED HANDŽIĆ
	SDU
25	DIZDAREVIĆ ENES

Odsutni vijećnik:

1. Asim Mujić

Prisutni gosti:

1. Nermina Durić-Kahvedžić - Radio Ilijaš
2. Mehmed Smajlović – Predsjednik Savjeta MZ Mrakovo
3. Šemso Jusić – Predsjednik Savjeta MZ Podlugovi
4. Predstavnici Elektrodistribucije Sarajevo: Nermin Dautović i Nedžad Hušić
5. Predstavnici Misoča d.o.o.
6. Načelnik 5. PU – Idriz Efendić
7. TV Vogošća

Ostali prisutni:

1. Akif Fazlić – općinski načelnik
2. Zdravko Barić – pomoćnik načelnika
3. Nijaz Spahić – pomoćnik načelnika
4. Meliha Avdibegović – pomoćnik načelnika
5. Merima Osmanović – pomoćnik načelnika
6. Sanja Zagorac-Jozić – pomoćnik načelnika
7. Sadeta Brkić – pomoćnik načelnika
8. Alma Imamović – pomoćnik načelnika
9. Ilda Kahriman – sekretar Općinskog vijeća
10. Aida Čutura – stručni saradnik u Stručnoj službi općinskog vijeća i općinskog načelnika
11. Adha Masnopita – stručni saradnik u Službi za društvene djelatnosti
12. Maida Habibović – viši referent u Stručnoj službi općinskog vijeća i općinskog načelnika – zapisničar.

Predsjedavajući je otvorio sjednicu i konstatovao da postoji kvorum za odlučivanje i dao na razmatranje zapisnik sa 11. sjednice OV-a Ilijaš.

Primjedbi na zapisnik nije bilo, pa je OV-e jednoglasno usvojilo zapisnik sa 11. sjednice.

Predsjedavajući je pročitao predloženi dnevni red.

Podsjetio je vijećnike da je takođe predložena dopuna dnevnog reda sa dvije tačke, i to:

3. Razmatranje problematike elektrosnadbijevanja na teritoriji općine Ilijaš i

18. Prijedlog Odluke o izmjeni Odluke o visini naknada vijećnicima, članovima stalnih i povremenih radnih tijela Općinskog vijeća Ilijaš.

Obzirom da nije bilo primjedbi na predloženi dnevni red, OV-e je jednoglasno usvojilo slijedeći

DNEVNI RED:

1. Vijećnička pitanja i inicijative
2. Izvještaj o realizaciji zaključka sa 11. sjednice OV-a

3. Razmatranje problematike elektroinštitucije na teritoriji općine Ilijaš
4. Prijedlog Odluke o:
 - a) usvajanju Regulacionog plana "Podlugovi I"
 - b) provođenju Regulacionog plana "Podlugovi I"
5. Prijedlog Odluke o:
 - a) usvajanju Regulacionog plana "Podlugovi II"
 - b) provođenju Regulacionog plana "Podlugovi II"
6. Prijedlog Odluke o pristupanju izradi Regulacionog plana "Alića gaj"
7. Razmatranje Inicijative Privrednog društva "Misoča" d.o.o. Sarajevo o uvrštavanju eksploatacije industrijske sirovine krečnjaka na eksploatacionom polju "Gornja Misoča" u izmjeni i dopunu Prostornog plana Kantona Sarajevo
8. Prijedlog Odluke o usvajanju Plana zimskog čišćenja puteva na području općine Ilijaš u sezoni 2013/2014. godine
9. Prijedlog Odluke o utvrđivanju novog građevinskog zemljišta i plana parcelacije za izgradnju apartmanskog naselja Ljubnići
10. Prijedlog Odluke o utvrđivanju novog građevinskog zemljišta i plana parcelacije za izgradnju apartmanskog naselja Bioča Faza I
11. Prijedlog Odluke o organizovanju i funkcioniranju zaštite od požara i vatrogastva na području općine Ilijaš
13. Prijedlog Odluke o prestanku statusa nepokretnosti u općoj upotrebi
14. Prijedlog Odluke o odobravanju prodaje motornog vozila
15. Prijedlog Saglasnosti za kandidovanje projekta zatvorene i otvorene tržnice "Ilijaš" Fondaciji OdRaz u Sarajevu u svrhu obezbjeđenja dijela sredstava za izgradnju objekta
16. Prijedlog rješenja iz imovinsko-pravne oblasti:
 - a) broj 06/1-31-3734/12 od 15.08.2013.godine
 - b) broj 06/1-31-2955/13 od 21.10.2013.godine
 - c) broj 06/1-31-2956/13 od 21.10.2013.godine
17. Informacija o stanju privrede i samostalnog privređivanja
18. Informacija o uspjehu i odgoju učenika u osnovnim i srednjim školama na području općine Ilijaš u školskoj 2012/2013. godini
19. Prijedlog Odluke o izmjeni Odluke o visini naknada vijećnicima, članovima stalnih i povremenih radnih tijela Općinskog vijeća Ilijaš.

AD-1

Vijećnička pitanja i inicijative

SEAD ŠEHIĆ – vijećnik SBB-a

Inicijativa:

1. Vijeće roditelja OŠ "Podlugovi" obratili su mi se da pokrenem inicijativu za popločavanje pješačke staze sa gornje strane školskog dvorišta. Naima, radi se o tome da djeca koja dolaze sa prostora Sovrla i ulaze sa gornje strane školskog dvorišta gdje je put blatnjav i trošan. Prilikom kiša i snijega djeca gaze po vodi i blatu, mokra im je obuća i noge i tako provode čitan dan u školi. Roditelji su se potrudili da dobiju predračun koliko bi to koštalo i kažu da bi to okvirno košta cca 2000,00 KM. Stoga vas molim radi interesa i zdravlja djece da se iznađu ova sredstva.

ENES DIZDAREVIĆ – vijećnik SDU

Inicijativa:

1. Obzirom da je počela školska godina 2013/2014 i da djeca svakodnevno idu u školu, pokrećem inicijativu da se uradi nešto po pitanju broja pasa lotalica na ulicama naše općine, a naročito u blizini škola.

MARIONETA ILIĆ-JURETA – vijećnica SDP-a

Pitanje:

1. Na koji način se uređuje korito rijeke Ljubine i ko ima privilegije – ljudi koji su starosjedioci, a kojima je svaki put poplavljena kuća, put i bašta ili vikend objekti koji hoće da imaju ljepši izgled bašte ?

Inicijativa:

1. Naša općina se sastoji od dva dijela od kojih često imamo osjećaj da je onaj drugi "gornji" zanemaren, kao što vidite i danas se uopće ne spominje, te Vas molim da na to obratite pažnju i da budu ravnomjerno raspoređena sva dešavanja vezana za oba područja.

MUHAMED HANDŽIĆ – vijećnik BPS-a

Pitanje:

1. Tražim odgovor na pitanje kakav je status dionice asfaltnog puta za Bioču koji je rekonstruisan 2012. godine i nije upotpunosti završen?

Obrazloženje: Navedena dionica puta na dužini od 400 m dužnih rađena je od strane firme CITAR PRODUKT, urađen je prvi sloj asfalta i do danas tako stoji.

Kada će se desiti završetak radova i da li investitor (Direkcija za ceste Kantona Sarajevo) ima obavezu da to okonča, prije nego što ovu dionicu puta preda na upravljanje Općini Ilijaš?

Ukoliko mi se nedaju adekvatne i tačne informacije, preduzet ću sve neophodne mjere da do njih dođem drugim putem.

2. Ko je odgovoran za sanaciju puta u Luci na kojem su nastala oštećenja prilikom izgradnje vodovodne mreže za industrijsku zonu?

Obrazloženje: U Mjesnoj zajednici Luka permanentno je prisutan problem vraćanja javnih površina u prvobitno stanje nakon izvođenja radova. Ovog puta napravljena je velika šteta na asfaltnom putu i došlo je do opravdanog negodovanja građana.

Molim nadležnu općinsku službu i inspektora da izađu na lice mjesta i pregledaju ovo što sam ja iznio.

Inicijativa:

1. Da se obezbijedi prevoz učenika iz Donje Karaule do škole i obrnuto.

Obrazloženje: Oko deset osnovaca iz Donje Karaule ide u školu u Semizovac zbog prevoza koji im nije obezbjeđen do Ilijaških osnovnih škola. Predsjednik Mjesne zajednice Ilijaš Stari i roditelji učenika više puta su inicirali ovaj problem kod nadležne općinske službe koji nikada nije riješen. S tim u vezi Vas molim da se ovaj problem što prije riješi.

2. Da se odluka kojom je ukinut jednodnevni topli obrok za prisutne na sjednici Općinskog vijeća stavi van snage, te da se od naredne sjednice otpočne sa podjelom toplog obroka u kafe kuhinji ove općine.

Obrazloženje: Evidentno je da se u vrijeme pauze za objedovanje veliki broj vijećnika i drugih učesnika sjednice ne vraća u salu Općinskog vijeća ili kasni i do sahat na sjednicu, pa je u tom smislu potrebno promijeniti način objedovanja.

Ovu inicijativu pokrećem u vidu zaključka u skladu sa članom 171. Poslovnika o radu ovog Općinskog vijeća, te u tom smislu molim vijećnike da se izjasne o istom.

SELVER HERIĆ – vijećnik SDP-a

Inicijativa:

1. Inicijativu upućujem općinskom načelniku da u svrhu predizbornih obećanja, a krenulo se sa postavljanjem v.d. Direktora, u tom smislu tražim postavljanje istog za zatvoreni bazen u Ilijašu i Sportsku dvoranu u Srednjem.

NIJAZ RASTODER – vijećnik LDS-a

Pitanja:

1. Dokle se stiglo sa izgradnjom tržnice u Ilijašu?
2. Koje su korekcije izvršene na Regulacionom planu Ilijaš Centar, šta je bilo predviđeno planom, a šta je sada predviđeno? Uz pisani odgovor tražim i skicu lokacije.

Inicijativa:

1. Podnosim inicijativu i predlažem da Općinsko vijeće Ilijaš istu pretvori u zaključak i glasanjem se izjasni o istom:

Predlažem da menadžment JU "Kulturno-sportski centar i Radio Ilijaš" u saradnji sa općinskom Službom za društvene djelatnosti u roku od 30 dana napravi Pravilnik o kriterijima za korištenje resursa Sportske dvorane u Ilijašu i raspodjeli termina. Cilj izrade ovog Pravilnika je da se obezbijedi neophodan broj termina za trenažni i takmičarski proces, u skladu sa prostornim, organizacionim i tehničkim mogućnostima, klubovima registrovanim na području općine Ilijaš uvažavajući slijedeće prioritete:

- ~ sportski klubovi iz reda dvoranskih sportova
- ~ rang takmičenja
- ~ broj uzrasno-takmičarskih kategorija
- ~ broj članova takmičarskih selekcija
- ~ postignuti uspjesi i rezultati.

Obrazloženje: Broj registrovanih klubova na području općine Ilijaš se konstantno povećava, tako da je postalo praktično nemoguće izvršiti raspodjelu termina na fer osnovi bez poštivanja određenih kriterija. Donošenjem ovog Pravilnika uvelo bi se znatno više reda u procesu raspodjele termina.

BESIM GLJIVA – vijećnik Stranke za Srednje

Pitanje:

1. Zašto nisu obilježena naseljena mjesta Moševići, Nišići i Krivajevići koja se nalaze uz Regionalni put Sarajevo-Olovo-Tuzla iako su sva naseljena mjesta na pomenutom potezu obilježena novim tablama prije nekoliko mjeseci?

Inicijativa:

1. Pokrećem inicijativu da se što prije uputi nadležna općinska komisija i utvrdi stanje objekta spomen kuća "Gajevi", koji je neophodno zaštititi premazom i bojom za drvo, jer isti nije od svoje izgradnje 2003. godine zaštićen, iako je kompletan objekat izrađen od drveta i prijeti njegovo propadanje.

ALAN ŠERAK – vijećnik SDP-a

Pitanje:

1. Zašto nisam dobio odgovor na postavljeno pitanje sa prethodne sjednice OV-a? I dalje tražim odgovor i nadam se da ću ga ovog puta dobiti, a tiče se uzurpacije dijela zemljišta u naselju Popovići.

2. Postavljam pitanje pomoćnici načelnika za društvene djelatnosti u vezi sa OŠ "Stari Ilijaš", a tiče se informacije o trenutnom stanju osnovne škole, kao i određenim kadrovskim rješenjima.

FAHIR HASANOVIĆ – vijećnik SDA-a

Pitanje:

1. Ko je nadležan za obilježavanje naselja i naseljenih mjesta? Zbog čega naselja na desnoj strani magistralnog puta M18 Sarajevo-Tuzla na općini Ilijaš nisu obilježena, jer činjenica je da većina tih mjesta nisu označena?

Inicijativa:

1. Da se označe sva naseljena mjesta koja do ovog momenta nisu označena.

Za riječ se javio predsjedavajući, pa je vođenje sjednice nastavio zamjenik predsjedavajućeg Mahir Dević.

DAMIR FILIPOVIĆ – vijećnik SDP-a

Pitanje:

1. Kako može predsjednik MZ-e Gajevi da ne dozvoli korištenje prostorije za popis stanovništva?

Inicijative:

1. Pokrećem inicijativu radi zabrinutosti građana MZ Gajevi, da nadležna služba zajedno sa općinskim načelnikom obiđe školu u Gajevima, te da iznađe načina kako da riješi situaciju u navedenoj školi, po pitanju sanitarnog čvora, ograde, grijanja i igrališta ako se može tako nazvati.
2. Da nadležna služba sa načelnikom općine, radi porasta broja napuštenih pasa na teritoriji općine Ilijaš, ponovo pristupi kafilerijskim uslugama, prema mogućnostima i zakonu.

3. Predlažem da se u narednom periodu pokušaju obezbjediti sredstva od strane Ministarstva za raseljena lica, Ministarstva za boračka pitanja, Ministarstva za privredu i "Sarajevo-šuma" kako bi se obezbjedila prohodnost i izgradnja puta Ljubina-Korita-Moševačko brdo (radi spajanja sa Moševačkim brdom i obilježavanjem dana pogibije Hašima Spahića, radi povratka u Korita i radi lakšeg pristupa šumskim resursima i razvoja poljoprivrede).
4. Da se postavi znak zabrane parkiranja kod zgrade gdje se nalazi Udruženja penzionera zbog nemogućnosti prolaska autobusa u tom dijelu.

Predlažem slijedeći zaključak:

1. Da načelnik općine radi transparentnosti rada Općinskog vijeća obezbjedi prijenos sjednica preko opcije web streaming, kako bi se zadovoljili ISO standardi, te isto tako da se uvede na oficijelnu Internet stranicu općine, registar vijećničkih pitanja i inicijativa.

Mahir Dević - obzirom da nema više prijavljenih vijećnika, riječ dajem općinskom načelniku Akifu Fazliću.

AKIF FAZLIĆ – općinski načelnik

Kada je u pitanju prijedlog zaključka Muhameda Handžića on ima za mene dva aspekta, jedan je organizacijski, a drugi "uslovno rečeno" finansijski.

Shvatio sam prijedlog vijećnika da se to više odnosi na organizacijski aspekt. U organizaciji rada organa uprave postavio sam standarde koji znače smanjenje tehničkog osoblja, tehničkih usluga, usluga koje nisu vezane za organ uprave, a u cilju poboljšanja kvalifikacione strukture u organu koji znači puno bolje stanje u službama za upravu. U tom smislu moj zaključak od prije godinu dana je bio ukidanje kafe-kuhinje u onom obliku kakva je bila. Ona je funkcionisala u jednom segmentu u vidu reprezentacija u okviru organa uprave, ali odlaskom ove uposlenice u penziju i ovaj će se segment izbaciti. Mi potpuno želi da ovo stavimo izvan institucije koja se zove Općina Ilijaš. Tako da, ako se misli na neku organizaciju doručka ovdje, nema pretpostavke za nju, ali ako se misli o finansijskom aspektu da se obezbjedi, možemo raspravljati, a evo danas je na dnevnom redu prijedlog povećanja vijećničkih naknada i treba i to uzeti u obzir.

Nastavak sjednice vodi predsjedavajući Damir Filipović – pošto nema prijavljenih, zaključujem raspravu povodom prve tačke.

Alan Šerak – ne možete zaključiti tačku, jer sam tražio informaciju od pomoćnice načelnika za društvene djelatnosti.

Predsjedavajući Damir Filipović – pozivam pomoćnicu načelnika za društvene djelatnosti Sanju Zagorac-Jozić, jer na osnovu Poslovnika postoji mogućnosti da se odgovori na pitanje na samoj sjednici ukoliko to zahtjeva neko od vijećnika.

Sanja Zagorac-Jozić – informacija će biti dostavljena u pisanom obliku, jer postavljena pitanja u mnogome nadilaze ingerencije nadležne službe tako da ih moramo uputiti u ministarstvo obrazovanja i kompletirati u informaciju koja će vam biti dostavljena na

narednoj sjednici OV-a.

Nedim Matoruga (poslovnička intervencija) – poslovnička intervencija se odnosi na to da ste Vi predsjedavajući zaključili raspravu, zaključili tačku i molim Vas da postupite u skladu sa tim. Ukoliko niste sigurni, uzmite tonski zapis i poslušajte. Dakle, nemate mogućnost da otvorite ponovo raspravu ili ako Vi otvarata raspravu, recite, i raspravljat ćemo do sutra. Samo recite na osnovu čega otvarate raspravu.

Alan Šerak (poslovnička intervencija, odnosno krivi navod) – gospodine Matoruga, očito Vam ne odgovaraju postavljena pitanja Vama kao predsjedniku Kluba vijećnika SDA, jer se inače radi o jednom od Vaših vijećnika koji se ovdje nalazi. Vjerovatno je to razlog. Predsjedavajući je želio da zaključi tačku i ja sam odmah reagovao. Prema tome, nema razloga da obustavite dalju raspravu po ovoj tački.

Dopunsko pitanje pomoćnici načelnika Sanji – informaciju će nam dostaviti vjerovatno ministarstvo obrazovanja. Međutim, ja sam imao pitanje vezano za određena kadrovska rješenja - članove školskog odbora, i ne vidim razloga zašto neko kao Vi koji vodite referat koji se zove osnovno obrazovanje ne pružite nam informaciju ko su ti ljudi koji su u školskom odboru i na koji način su došli u školski odbor.

Nedim Matoruga – predsjedavajući, ako želite da sjednicu vodite u ovom toku, možemo cijeli dan ostati na ovoj tački, a Vi nastavite tako. Ne znam odkud Vam pravo kolega Šerak da kažete da meni nešto odgovara ili ne odgovara. Moja intervencija je bila na to da je predsjedavajući zaključio tačku, dakle nikakve veze nema sa tematikom koju ste ovdje iznijeli. Na kraju krajeva i ovo što tražite i maltretirate pomoćnicu načelnika u smislu da iste sekunde mora imati sve informacije, po meni nema veze sa Poslovnikom. Dakle, navoditi da meni nešto odgovara ili ne odgovara, a ja sam intervenisao na Poslovnik, ja bih rekao da je to neosnovano.

Alan Šerak (krivi navod) – uvaženi kolega Matoruga nema potrebe da Vi meni imputirate da ja nekoga maltretiram, jer ne maltretiram nikoga. Vi mora da znate da sam ja vijećnik Općinskog vijeća Ilijaš i kao takav imam pravo da postavljam pitanja pomoćnicima načelnika. Po meni, pomoćnik načelnika za društvene djelatnosti je osoba koja mora da zna šta se to dešava u osnovnim i srednjim školama na području općine Ilijaš. Zamolit ću Vas da mi ubuduće ne imputirate nebuloze i laži kako ja nekoga maltretiram.

Nedim Matoruga (krivi navod) – kolega Šerak, Vi sami sebe demantirate, jer kao vijećnik treba da znate da po zaključenoj tački nemate pravo da se javljate više po tom pitanju.

Adem Efendić (poslovnička intervencija) – u članu 88. stav 2. Poslovnika OV-a stoji da se pretres vodi dokle god ima prijavljenih. Kolega Šerak je postavio pitanje, a pomoćnica načelnika je odgovorila i možemo ići dalje.

Predsjedavajući Damir Filipović – zaključujem prvu tačku dnevnog reda.

Uslijedila je pauza od 10 minuta.

Nastavak u 11 h.

Predsjedavajući Damir Filipović – nakon pauze od deset minuta, nastavljamo sa radom. Obzirom da je zaključio prvu tačku dnevnog reda, predložio je drugu tačku, a glasanje za zaključke koji su bili predloženi bit će na idućoj sjednici OV-a.

AD-2

Izvještaj o realizaciji zaključka sa 11. sjednice OV-a

Diskutanata po ovoj tački dnevnog reda nije bilo, te je OV-e jednoglasno usvojilo

Izvještaj o realizaciji zaključka sa 11. sjednice OV-a

AD-3

Razmatranje problematike elektrosnadbijevanja na teritoriji Općine Ilijaš

Akif Fazlić – Problematika elektrosnadbijevanja je kulminirala prošlog vikenda kada smo imali i subotu i ponedjeljak potpunu obustavu elektrosnadbijevanja. Ovo je bila kulminacija na koju moramo dati odgovor. Naime, ova problematika ima svoja dva segmenta. Jedan je segment, uslovno rečeno, fizičko obezbjeđenje objekata Elektrodistibucije kada je u pitanju elektrosnadbijevanje Ilijaša, a reflektuje se kroz krađe kablova, a time i periode obustave elektrosnadbijevanja. Taj segment praktično pokriva Elektrodistribucija Sarajevo i 5. Policijska uprava ili još neke policijske uprave obzirom da se radi o dalekovodu Blažuj-Bioča-Luka-Ilijaš.

Želim se zahvaliti načelniku 5. Policijske uprave i predstavnicima Elektrodistribucije Sarajevo koji su prisutni ovdje i zaista želimo da od vas danas čujemo i dobijemo garancije da je ovaj prestanak elektrosnadbijevanja Ilijaš u ponedjeljak, neću reći bio zadnji, ali on mora biti na određeni način zadnji, obzirom da se na ovaj način ugrožava rad privrede, ustanova, elementarni kvalitet života građana u Ilijašu.

Drugi segment jeste dugoročnije rješavanje elektrosnadbijevanja općine Ilijaš.

Sada je to tako da je elektrosnadbijevanje Ilijaša, narodski rečeno, na jednoj žici. Mi moramo tu situaciju preokrenuti, pronaći alternativni način snabdjevanja. Znamo da ima dalekovoda iz Željezare Ilijaš i iz pravca Kaknja.

Danas očekujem od predstavnika Elektrodistribucije Sarajevo da pokrenemo priču kako i na koji način da ovo srednjoročno postavimo oko izgradnje sistema, pogotovo što Ilijaš stalno ima jedan rast, kako s aspekta rasta broja stanovnika, stambene izgradnje, a imamo i industrijsku zonu Luka. Po mojim informacijama još neki novi veći potrošač izazvao bi probleme elektrosnadbjevanja.

Treba predložiti konkretne mjere i rješenja, kako se ne bi naši u sličnoj situaciji.

Idriz Efendić (načelnik 5. PU) – Ukupna sigurnosna situacija na području naše policijske uprave u proteklom periodu zahtijevala je i zahtjevat će pojačane policijske aktivnosti na praćenju kriminala, spriječavanju grupa, pojedinaca koji su skloni krivičnim djelima, narušavanju javnog reda i mira. Ključni problem ovih dana je otuđenje elektro kablova na području općine Ilijaš. Moram da kažem da je ovo vrlo složen i kompleksan problem koji egzistira duži vremenski period i koji obuhvata nekoliko općina KS, uključujući i Ilijaš gdje dobro organizovane grupe uz pomoć improvizovanih sredstava i drugih rekvizita, uz primjenu znanja i vještina otuđuju elektrokablove za napajanje električnom energijom naše općine. Policijski službenici radeći na rasvjetljavanju navedenih krivičnih djela preduzimali su i preduzimaju mjere, niz operativnih i taktičkih mjera i radnji, prije svega na prikupljanju operativnih saznanja o mogućim izvršiocima, zatim na saradnji i uvezivanju sa drugim policijskim upravama i na prikupljanju drugih mjera i radnji. Shvatajući značaj, težinu i posljedicu krivičnih djela, PU Ilijaš sačinila je plan rada aktivnosti postupanja policije na spriječavanju navedenih krivičnih djela koji se ogledaju, prije svega, u fizičkom prisustvu u području, opserviranju, nadziranju, formiranju timova što se ogledalo u stalnom zadatku da smo prisutni u osjetljivim područjima. Tokom godine do današnjeg dana registrovano je

10 krivičnih djela otuđenja kablova u Ilijašu. Otušeno je ukupno 3535m elektronskog kabla. Između ostalog, od ukupnog broja krivičnih djela, otkriveno je jedno. U Gornjim Malešićima uhvaćena su dva lica na licu mjesta izvršenja. Takođe tokom godine 10 puta registrovane su krađe kabla u općini Novi Grad i svako presijecanje kablova u Novom Gradu ili na području Iliđe reflektuje se kao negativna posljedica na Ilijaš, kao krajnja posljedica koja rezultira nestanskom električne energije.

Mjere i radnje koje smo preduzimali, nažalost, moram reći da su bile nedjelotvorne. Obzirom na veliko područje, nije moguće svih 24 h svaki dio pokrivati, te bi stoga bilo neophodno potrebno da određene mjere samozaštite preduzmu sami privredni subjekti nadležni za prijenos električne energije do općine Ilijaš. Uključivanje privrednih subjekata ogledalo bi se u tome što bi svakodnevno u različitim periodima i noću i danju obilazili ta područja u saradnji sa nama i davali nam informacije od koristi. Drugo, ako je moguće instaliranje tehničkih uređaja u cilju nadzora ugroženih područja i treće, iznalaženje alternativnih načina prenosa električne energije do područja općine Ilijaš. Kroz dosadašnje analize rada, mi u policiji smo više puta utvrdili da nije bio mali broj informacija koje smo dobijali od građana na osnovu kojih smo rasvjetlili određena krivična djela. Znači, poznato je da su građani vrlo značajan subjekt sigurnosti i ključna je saradnja lokalnog stanovništva sa lokalnog područja u smislu pravovremene informacije o sumnjivoj i inkrimisanoj radnji. Nažalost, u ovom kontekstu i u ovom segmentu ta saradnja je izostala ili nije podignuta na željeni nivo. Ono što takođe smatram da treba reći je da ova vrsta krivičnog djela ima obilježje međukantonalnog i međuentitetskog kriminala i ovo je, između ostalih, jedan od razloga što otežava našu istragu i pronalazak izvršioca. Ovih dana vrše se ozbiljne pripreme na nivou MUP-a KS s ciljem poduzimanja zajedničkih mjera i aktivnosti po ovoj problematici. O detaljima sada ne mogu govoriti, ali kada se aktivnosti provedu, blagovremeno ću vas upoznati pismeno i usmeno. Rezimirajući sve ovo što se dešavalo mi smo u policiji mišljenja da se sa preventive pređe na represiju, odnosno na hapšenja, a nakon toga da u saradnji sa tužilaštvom izbjegnemo dosadašnju kvalifikaciju ovih djela koja su kvalifikovana kao teška krađa i da nađemo uporište u Krivičnom zakonu FBiH i preinačimo je u uništenje i oštećenje značajnih privrednih objekata gdje je predviđena kazna zatvora od 1-10 godina. Svjesni ozbiljnosti problematike koja se manifestuje kroz ovu vrstu krivičnih djela, te posljedica koje nastupaju nestankom električne energije na našoj općini i pored brojnih poslova koje imamo, a imajući u vidu da smo jedna od najrasprostranjenija općina u Kantonu, iznaći ćemo mogućnosti i dodatnog napora u cilju praćenja, rasvjetljavanja i hapšenja počinitelaca ovih krivičnih djela. Na kraju, da kažem da samo zajedničkim aktivnostima kroz saradnju policija-zajednica, saradnju policija-privredni subjekti, zatim saradnju pravna i fizička lica i građani kada udružimo sve te kategorije nadam se da ćemo u ovom pogledu i ovom polju poboljšati stanje i suzbiti ovu pojavu.

Nermin Dautović (predstavnik Elektrodistribucije – rukovodilac sektora za održavanje mreža i postrojenja Kantona Sarajevo) – Osnovno napajanje kompletne općine Ilijaš je iz Blažuja. Elektrodistribucija Sarajevo je ugradila još jedan transformator u Ilijašu obzirom da je u prethodnom periodu bila povećana potrošnja električne energije, ali nažalost samo preko tog dalekovoda. Ilijaš se može alternativno napojiti iz pravca Breze i pravca Semizovca, međutim to je alternativni pravac i iz tih pravaca nema dovoljno energije za cijelu općinu Ilijaš. U periodu od 15. 02. do sada nedjelje na ovom dalekovodu zabilježene su 24 krađe i ispada napajanja. Te krađe naprave toliku štetu, da to nije moguće brzo otkloniti, zbog toga ostajete dugo bez napajanja. Rješavanje problema napajanja nije do Elektrodistribucije već do Elektroprenosa. U Ilijašu je prisutan napon 110, ali je potrebno izgraditi trafostanicu i to bi bilo osnovno napajanje, a ovo sad bi bilo alternativno. Ovo sada

je trenutno dovoljno, ali problem je što je samo napajanje iz jednog dalekovoda. Distribucija čini sve što može učiniti, u slučaju ispada šalje ekipe koje to otklanjaju. U Elektrodistribuciji nije niko obučavan da se bori protiv krađa. Mi u slučaju ispada to popravljamo i to traje koliko traje. Do sada je ukradeno 5,5 tona užeta, vrijednost tog jednog bakarnog novog užeta iznosi na tržištu 437 hiljada maraka. Svaka opravka košta i materijala i radne snage. Sada mi umjesto ovog bakarnog užeta stavljamo aluminijski vodič, koji im nije još interesantan. Mi ćemo i dalje reagovati na prvu ukoliko neko ostane bez struje.

Nedžad Hušić (predstavnik Elektrodistribucije – Rukovodilac službe za pripremu investicija) – Kratko ću se osvrnuti na investicije na vašem području. Općina Ilijaš je jedna od općina na Kantonu u koju Elektrodistribucija najviše ulaže. U 2012. godini na području općine Ilijaš uloženo je cca 1 120 000 hiljada maraka. U 2013. godini planirali smo investirati blizu 300 000 maraka. Za 2014. preko 430 000 i preko 300 000 u 2015. godini. U vezi industrijske zone Luke, mi smo već ugradili još jedan transformator, položili smo dva srednjenaponska kabla. Svaki objekat za koji je podnesen zahtjev na ovom području priključen je na napajanje i za njih su izgrađene transformatorske stanice. Izgrađena je i transformatorska stanica za područje Željezare. Elektrodistribucija ulaže sve napore u okviru svojih nadležnosti da građani i privredni subjekti imaju sigurno i kvalitetno napajanje. Ovo što se dešava zbog krađa, prevazilazi naše nadležnosti.

Predsjedavajući otvara raspravu po ovoj tački dnevnog reda i poziva vijećnike ukoliko ima neko ko se prijavljuje za raspravu.

Sead Šehić – Gospoda iz Elektrodistribucije je rekla da vod iznosi 15 km, te policija ne može pokriti to područje sama. Zbog toga postavljam pitanje Elektrodistribuciji, jer je to njihovo vlasništvo, zašto ne angažuju zaštitarske agencije da pokušaju pomoći policijskoj upravi u čuvanju, obzirom da imaju sredstva, te su velika i jaka firma.

Nijaz Rastoder – Nije mi jasno da u Ilijašu, ovdje gdje u svojoj kući večerate i sutra zna cijela čaršija šta ste večerali, a da se ne zna ko je ukrao nekoliko tona kabla. Nije mi jasno kako neko dođe prekine kabal i preveze svu tu masu, mislim da je to grupacija, ne jedna osoba. Ne znam također zašto načelnik traži nešto zastrašujuće, traži alternativu da bi se spasili od lopova. Ne znam da li smo mi prebogat da imamo te alternativne linije ili je vanredno stanje u Ilijašu. Zna se kad se ide na alternativne načine.

Nedim Matoruga – Ja se ne bih složio sa svojim prethodnikom, obzirom da alternativa i postoji zbog toga da se aktivira kad primat padne. Moje konkretno pitanje za elektrodistribuciju je: "Zašto se nisu aktivirali alternativni pravci u proteklih mjesec dana." Imali smo više puta u toku mjeseca nestanka struje. U ponedjeljak u Ilijašu niste imali gdje kopirati jedan A4 papir. Jedan od zaključaka po meni bi trebao da bude da dok se ne uspostavi primat da se napaja alternativom ono što se može napajati. Imamo objekte od značaja, Dom zdravlja i druge objekte koji bi trebali funkcionirati. Interesuje me nešto što je bilo prije par mjeseci, a to je da je kada je nestajalo struje Željezara kompletna imala struju. Šta se desilo u zadnjih par mjeseci? Jesmo li svi na Luci? Zbog čega jedan dio ta privreda ne ide preko tog drugog napajanja. Od Policijske uprave očekujemo da se to riješi u kratkom periodu. Ne slažem se sa kolegom Rastoderom da je kriv neko iz Ilijaša. Jasno je da se to radi o nekom širem području, obzirom da se radi od 5,5 tona bakra. Neko je educiran više.

Nijaz Rastoder (krivi navod) – Nije tačno da sam ja rekao da su građani lopovi. Nije tačno. Ja sam samo rekao da se sve zna. Da narod svašta zna. Ti nemoj meni inputirati da sam ja rekao da su to ukrali građani općine Ilijaš.

Muhamed Handžić - Osim što sam vijećnik, ja sam i predsjednik u mjesnoj zajednici u kojoj se sve ovo i dešava, te imam obavezu da vam se obratim. Evidentno je prisustvo policije svake noći u Bioči, do samog jutra, te i legitimisanje građana, a sve radi otkrivanja počinitelja ovih kriminalnih radnji. Građani su uznemireni, nije svima jasno šta se dešava i kako za šest mjeseci, kako traje ova agonija, ništa se nije riješilo. Svima nam je poznato da mi svi moramo da čuvamo svoju imovinu, te u ovom smislu prozivam Elektrodistribuciju Sarajevo. Ovdje su dva njihova predstavnika, ali nam nije dat odgovor šta dalje, kako ćemo se mi zaštititi i na koji način riješiti problem snabdijevanja Ilijaša strujom. Poznato vam je da postoji trafostanica u Željezari 110 KW, ali zbog vaše komunikacije sa Kaknjom vi to ne radite. Mi želimo da nam to riješite. U ponedjeljak nije bilo struje osam sati, zato što ne preduzimate mjere na zaštiti svoje imovine. Policija ne može čuvati. Rješavajte alternativno napajanje Ilijaša iz pravca Kaknja, kako ćete to uraditi to vi rješavajte. Mi smo jedna država. Drugo pitanje načelniku policije – zbog prisustva policije u tom području, da ako treba pomoć stanovnika tog područja, mada ti dalekovodi zaobilaze naseljeno područje, te se vjerovatno može doći nekim šumskim putevima.

Mahir Dević – Volio bih da budemo pragmatični, jer se radi o ozbiljnom problemu. Mislim da vi nama danas morate ponuditi rješenje. Bilo da je rješenje trafostanica u Željezari ili neki drugi pravac. Morate shvatiti da pričinjavate veliku štetu ionako slaboj privredi. Zamislite kako je onim poljoprivrednim proizvođačima, da moraju kupovati agregate da pripreme sve za sjetvu. To su zaista ozbiljni problemi. Imamo velikih proizvođača, čak neke najveće u Kantonu. Ja bih voli da imamo zaključke danas kako vi nama garantirate da više nećemo ostati bez struje, jer se zaustavljaju svi procesi.

Marioneta Ilić-Jureta – Ja bih da postavim jedno pitanje: "Ako su te žice pod naponom, kako jedan laik može da dođe i presiječe te žice i odnese. Postavlja li se pitanje da li je neko iz Elektrodistribucije uvezan u to, koji zna kad će se skopka dići, kad će se presjeći. Ja sam da se Elektrodistribucija i Policija udruže i nađu počinioca. Mora neko biti upućen i znat, i sve je to neko iz Elektrodistribucije. Mora se pronaći i drugi izvor, alternativa mora uvijek postojati.

Akif Bešlija – Nadovezat ću se na ovu diskusiju. Policijskoj upravi dajem potpunu podršku, jer sam očevdac koliko se angažuju. Rizikuju svoje živote i čuvaju to područje, jer vjerujete ti počinioci spremni su da sve urade. Moramo se zapitati da li im mi ikako pomažemo. Što se tiče Elektroprivrede, ona treba da se uključi kao što kaže kolega Sead da angažuje zaštitarske agencije i recimo uključe svoje zaposlenike. Ne slažem se da treba alternativni priključak. Građani ne treba da ovo trpe, već ovo treba što efikasnije da se riješi.

Selver Herić – Skrenuo je prethodniku pažnju, koji je pomenuo poljoprivrednike kao one koji trpe pri nestanku struje, da za poljoprivredu nije potrebna struja, te moli da se obezbijedi struja onima koji je koriste i kojima se isključi ukoliko je ne plate, a prvenstveno građanima. Kako će to uraditi, da li alternativno ili ne, to oni znaju.

Adem Efendić – Ja tražim ovdje od Elektrodistribucije, odnosno Elektroprivrede da nam kaže kako će oni nas snabdjeti električnom energijom. Kako ćete to vi raditi, kako riješiti alternativne pravce, to je vaš problem. Nama dođite za govornicu i kažite kako ćete to

riješiti.

Zamjenik predsjedavajućeg općinskog vijeća Ilijaš zamolio je predstavnike iz Elektro distribucije da odgovore na pitanja, kako bi Vijeće moglo donijeti adekvatne zaključke.

Nermin Dautović – Što se tiče zaštitarski firmi, to vam je ne mogu odgovoriti, o tome odlučuje menadžment, a ja ću im prenijeti šta se ovdje govorilo. To što se ne uključuju alternativni pravci, profesionalno, ne politički, mogu vam odgovoriti da je to jedino ispravno, jer uključivanje alternativnih pravaca može uslijediti tek nakon što se ispune odgovarajući uvjeti i to traje jako dugo. Žao mi je što vi smatrate da je osam sati dugo (koliko traje popravak). Trafostanica u Željezari je vlasništvo Željezare, a ne Elektro distribucije. Distribucija je napravila trafo stanicu u Željezari i napojila subjekte na tom području. Alternativne pravce aktivirat ćemo kada mi procijenimo da treba. Treba uhvatiti lopova, a ne razmatrati šta mi da uradimo. Dalekovod je zaštićen da ne bi nekog ubio. Nemoguće je zaštititi od krađe. Kada dođe do nekog spoja on se isključi. Kako oni vrše to presijecanje, to ne znam. Na svaki prijekid mi reagujemo tako što šaljemo ljude i popravljamo to.

Nedim Matoruga – Možete li mi samo odgovoriti kako smo do prije mjesec-dva imali struju iz Željezare?

Nermin Dautović – To je alternativno napajanje. Došlo je do porasta potrošnje u zimskim mjesecima, pa je izvršeno priključenje na Brezu, ali tada rizikujemo da se raspadne sistem i da Breza i rudnik u Brezi ostane bez električne energije.

Nedim Matoruga – Ako je trafostanica u Željezari u vlasništvu željezare, kako da su i neke zgrade napajale se iz tog pravca. Šta se desilo tu?

Nedžad Hušić – Kolega Dautović je rekao da je trafostanica u Željezari vlasništvo željezare i svi su se subjekti na tom području do prije mjesec-dva napajali s te stanice. Prema opštim uslovima Elektro distribucija može vršiti napajanje svojih kupaca samo preko objekata koji su njihovo vlasništvo, te smo položili kablove od Luke i sve svoje subjekte koji su se nalazili u krugu Željezare pripojili sa te strane. Stoga se svi ti subjekti napajaju sa transformatorske stanice Luke. Zato dođe do prekida u napajanju Luke, do prije mjesec-dva oni su bili napojeni sa transformatorske stanice u Željezari, ali to nije u skladu sa pravilima, sa zakonom. Stoga smo mi njih morali napajati sa naše transformatorske stanice. Ljudi koji se razumiju po pitanju elektrostruke nisu svi u Elektro distribuciji, ima ih puno koji su nezaposleni i koji rade po drugim firmama.

Nermin Dautović – Dok nismo prebacili sve subjekte iz Željezare na Luke, samo su ti subjekti bili napajani iz Željezare, ne Ilijaš. I do tada pri nestanku struje Ilijaš je ostajao bez napajanja, samo se industrijska zona napajala sa te transformatorske stanice.

Nedim Matoruga – Ja neću u potpunosti prihvatiti vašu konstataciju da vi niste krivi za nestanak struje, krivi ste i vi s kojima svi naši građani imaju potpisan ugovor, mi plaćamo, vi dajete struju. Kako ćete je obezbijediti to vi riješite. Vi kao Elektro distribucija morate obezbijediti kvalitetnu alternativu. Mora imati neki dalekovod koji se uključuje dok se ovo ne riješi. Nas to interesuje. Šta ćete vi ako neko, ne ja, pokrene peticiju o građanskoj neposlušnosti gdje se kaže da svi građani Ilijaša neće plaćati struju, a vi dođite pa

isključite. Šta ćemo onda? Ja ne pozivam na to. Šta će privrednici koji imaju penale za neisporučenu robu, zato što nisu imali struje? Molim vas da shvatite da ima i vaše odgovornosti, nije isključivo vaša, ali ima i vaše. Vi treba da obezbijedite kvalitetan dovod, a ne alternativu da uključite dvije tri kuće. Ako treba kakva podrška Vijeća, ja je obećavam u ime svih, ali dajte da nađemo neko rješenje.

Nermin Dautović – Kada sam rekao da nismo krivi mislio sam na konkretne slučajeve ovih ispada, jer nije Ilijaš ostao bez električne energije zbog nekog kvara, već isključivo zbog krađe. Ja vam ne mogu odgovoriti na to, ja ću sve prenijeti menadžmentu. Mogu samo reći da ćemo uvijek na prvu reagovati.

Selver Herić – Mislim da se ova tačka pretvorila u sijelo i moram zamjeriti vašem menadžmentu što je vas poslao na ovako ozbiljnu sjednicu. Ovo je vijeće zakonodavno tijelo, najviši organ Općine Ilijaš i vi ste došli da nam ne znate ništa odgovoriti. Kad ste rekli da je ovo politikanstvo, moram vam reći da se ovdje svak mora baviti svojim poslom, mi jesmo političari, a vi ste oni koji isporučuju struju i koji naplaćuju. Dali ste nam odgovor da ako bude krađe, neće biti struje, a ako ne bude krađe, biće struje. To mi znamo. Niste nam dali nikakvo rješenje, naročiti kada ste spomenuli alternativu, koju ste po meni nazvali rizik. Čuj imate alternativu, ali ne smijete je uključiti da ne bi i Breza ostala bez struje. To nazovite rizikom. Da pretvorimo ovo u malo ozbiljniju priču. Mi tražimo struju, i ja neću kao prethodnik reći da ne pozivam građane. Ja pozivam sve građane, ako se desi ovo što se desilo da svi bojkotujemo plaćanje struje i da vas opametimo, jer ste vi država u državi. Imate novca koliko hoćete, raspolazete s njim kako hoćete i imate obavezu da zaštitite i vodove i građane i ostale kako znate naplatiti.

Zamjenik predsjedavajućeg – Mi moramo neke zaključke usvojiti koji vode ka rješavanju ovog problema. Ovo do sad je bila identifikacija. Mi ovo sve znamo. Prema tome, ova tačka, kao vanredna tačka na ovoj sjednici je bespredmetna ukoliko mi nemamo zaključaka. Predlažem da nas načelnik usmjeri u kom pravcu da djelujemo.

Akif Fazlić – Slažem se da smo nekako relaksirali temu, a ona uopšte nije relaksirajuća. Želim podsjetiti i predstavnike Elektro distribucije i policijske uprave, da ovi ljudi koji ovdje sjede predstavljaju 20 hiljada građana, a koji nemaju struje kad se presiječe kabal, i da predstavljaju 150 privrednih društava i 500 samostalnih privrednika, koji nemaju struje kad se presiječe kabal, i da mi ovdje pričamo u blagoj formi u kakvoj to pričaju naši građani i naši privrednici. Kod mene je u ponedjeljak bilo opsadno stanje, jer je to ne znam koji put se desilo, zato moramo vrlo ozbiljno prići rješavanju ovog problema. Danas smo puno toga ispričali i dobili smo dosta informacija i od strane Policijske uprave i od strane Elektro distribucije i ja možda vidim jedan jedini zaključak koji bismo mi mogli danas formulirati, a to je da tražimo od Elektro distribucije da nam u narednih 10-15 dana dostavi program mjera, program rješenja ovog problema, koji će građanima garantovati uredno snabdjevanje Ilijaša.

Zamjenik predsjedavajućeg je stavio na glasanje slijedeći

ZAKLJUČAK

Traži se hitno od Elektro distribucije Sarajevo da u roku od 10 dana napravi program mjera i program rješenja koji će garantovati uredno snabdjevanje Ilijaša električnom energijom i iste dostavi Općinskom vijeću Ilijaš.

Općinsko vijeće je navedeni zaključak jednoglasno usvojilo.

AD-4

Prijedlog Odluke o:

- a) usvajanju Regulacionog plana "Podlugovi I"
- b) provođenju Regulacionog plana "Podlugovi I"

AD-5

Prijedlog Odluke o:

- a) usvajanju Regulacionog plana "Podlugovi II"
- b) provođenju Regulacionog plana "Podlugovi II"

Zamjenik predsjedavajućeg OV-a – Pročitao tačke 4. i 5. dnevnog reda i predložio zaključak da se zajedno razmatraju, obzirom da se radi o istom prostoru. Zaključak je stavio na glasanje. OV-e je sa 13 glasova ZA, 4 PROTIV i 3 UZDRŽANA usvojilo navedeni zaključak.

Predsjednik Kluba SBB je izrazio sumnju u glasanje, na što je zamjenik predsjedavajućeg odgovorio da se po Poslovniku ne može izraziti sumnja u glasanje kada se radi o zaključku, već kada se glasa o tački dnevnog reda, te je prešao na razmatranje tačaka 4. i 5. i zamolio predlagачa da obrazloži prijedlog.

Meliha Avdibegović – Rekli smo da nam treba regulacioni plan Podlugovi, a samo zbog veličine prostora razdvojili smo ga na I i II. Ne možemo usvojiti Podlugove I, bez Podlugova II ili obrnuto. Dat ću vam kratko obrazloženje za oba plana. Usvajanjem regulacionog plana Podlugovi I i Podlugovi II cijeli urbani dio Ilijaša će biti pokriven od Malešićkog mosta do izlaza prema Visokom i Brezom. Jedna smo od rijetkih općina na području Kantona da svake godine usvajamo bar jedan Regulacioni plan. Obuhvat oba plana je 111 hektara, iz kojeg razloga smo se odlučili na izradu dva Regulaciona plana. U sklopu obuhvata definisane su zone individualnog stanovanja, stambeno-poslovne zone, zone centralnih djelatnosti, provredna zona, sport, rekreacija i zaštitno zelenilo, zona saobraćajne infrastrukture, željezničke stanice Podlugovi i regulacija potoka Gnionica i Stavnja. Cilj izrade plana je urbano uređenje Podlugova, koji će lokalnom stanovništvu omogućiti kvalitetniji život, obzirom na ekspanziju izgradnje stambenih i stambeno-poslovnih, poslovnih i prevrednih subjekata koja nije adekvatno praćena izgradnjom saobraćajne, komunalne i društvene infrastrukture: Osnovne postavke koncepta zasnovane su na zadržavanju koncepta primarne saobraćajne mreže definisane Urbanističkim planom Grada Sarajeva za urbano područje Ilijaš 1985-2003, sanacija postojećeg stanja, poboljšanje standarda i kvaliteta života stanovnika, opremljenost prostora potrebnim društvenom, komunalnom i saobraćajnom infrastrukturom, ostvarivanje saobraćajne povezanosti naselja sa naseljima u kontaktnoj zoni, te poboljšanje sigurnosti pješaka rješavanjem pružnog prelaza ispod nivoa terena, kao i formiranje zona zaštitnih zelenila u skladu sa prostornim mogućnostima. Definisanjem prostora u granicama planova dobiveni su sljedeći urbanističko-tehnički pokazatelji. Ukupan broj stanovnika oko 3 400, gustina naseljenosti 60 stanovnika po hektaru, ukupna tlocrtna površina objekata 108 404 m² od toga 14 814 m² novoplaniranih objekata. Donošenjem plana u potpunosti je zadovoljena zakonom propisana procedura. Ostvaren je kontakt sa građanima u više navrata, sve primjedbe i sugestije koje su bile najvećim dijelom su usvojene. Obrazloženje neprihvaćenih inicijativa imate u prilogu ovog materijala. Komisija za statut i propise i Komisija za prostorno uređenje, stambeno-komunalne poslove i ekologiju nije imala primjedbi niti na pravni osnov, niti na sam plan, te predlažem da se ove odluke o usvajanju i odluke o provođenju Regulacionog plana Podlugovi I i Podlugovi II usvoje kao u tekstu.

Zamjenik predsjedavajućeg je otvorio raspravu po tačkama 4. i 5.

Adem Efendić – Iako ste povrijedili poslovnik spajajući ove dvije tačke, ono što se mora za mene je obavezujuće. Ovo što ste spojili nije ispravno. Navest ću jedan razlog Regulacioni plan Podlugovi I nema privrednu zonu. Regulacioni plan Podlugovi II ima privrednu zonu. Imalo se prostora zašto nema u jednom, a ima u drugom i zašto nema u oba. Preći ću konkretno na stanje. Regulacioni plan I i II je urađen onakav kakvog ga vidimo zaista pod pritiskom iz SDA, direktno Mahira Devića i Nedima Matoruge. Ljudi koji su ponudili prvobitno rješenje učestvovao sam u javnim raspravama od radnih verzija koja je organizovana u Osnovnoj školi u Podlugovima, pa sve do ove rasprave koja je održana 02. 08. Od ovih koji trebaju danas donijeti odluku nije niko bio naročito od predstavnika političkih partija i predstavnika MZ koje se ovo tiče, sem Predsjedavajućeg Damira Filipovića koji se kasnije pridružio i onih privrednika koje ova dvojica šlepaju, koji su čak i ometali javnu raspravu.

Zamjenik predsjedavajućeg je opomenuo vijećnika Adema Efendića da se pridržava primjerenog vokabulara, u protivnom će mu oduzeti riječ.

Adem Efendić – Ne možete mi oduzeti riječ kršeći pravila i molim vas da mi dozvolite da nastavim.

Regulacioni plan Podlugovi I i Podlugovi II u odluci koja je donešena 2010. godine kaže: Pri izradi regulacionih planova vodit će se računa o kvalitetu življenja. Pogledajte saobraćajnicu koja silazi sa autoputa, dolazi na naplatnu rampu kako ćete se uključiti i izvršiti skretanje za Ilijaš kada imate auto koje čeka na uključenje prema Visokom ili istoj strani. Naročito šleper ili autobus. Najbitnije su saobraćajnice. Ugrožavate život, odnosno kvalitet življenja ljudi koji se nalaze na onoj strani iza pruge gore, zato što u dijelu najmanje 3-4 km od spoja sa Regulacionim planom Banovac do Ine, do Breze nemate nijednog prelaza, a imate objekte gdje ljudi rade i žive zbog kojih ste satrli onaj prvi prijedlog koji je čovjek od struke rekao da je ono rješenje koje je nuđeno prelazom preko pruge kvalitetnije, ali je skuplje. Šta će to značiti u narednom periodu ako mi začepimo Sarajevo u Podlugovima sa ovim našim nekim jeftinijim varijantama? Prisilili smo ljude da daju novo rješenje, iako i ovdje na raspravi rekli su da je ono bilo bolje rješenje. Na desnoj strani na potezu Ulica Žrtava genocida u Srebrenici nema skoro nijednog privrednog objekta, a toliko prostora. Između drumskog i željezničkog saobraćaja ima toliko zemljišta i toliko širine prostora, a mi smještamo neke svoje simpatizere u ovom dijelu tačno gdje će ometati saobraćaj, život i rad. Pogledajte koliko u jednom dijelu imate slijepih ulica. Što je najgore idete Polomskom ulicom i dolazite ispod katoličkog groblja, gdje se ne možete spojiti u ulicu koja će nekim dijelom, kako se vidi ovdje, od trgovinske radnje Jabuke siječe posred Vratuše, zar ne možete spojiti sa ulicom koja sad ide za Vratušu, a da ne govorim ove još manje sokačiće. Izmjena je bilo, koje su ljudi upućivali i Služba je neke opravdano i prihvatila.

Klub vijećnika SBB neće podržati ovaj Regulacioni plan iz ovih razloga koje sam naveo i sigurno zbog nezadovoljstva većeg broja građana koji žive dole i kojima se radi ovaj Regulacioni plan. Iznijet ću jednu zamjerku i Predsjedniku Savjeta MZ, zbog građanstva iz Podlugova, koje nije obavještavao i ja sam lično insistirao da Regulacioni plan kad se tiče mjesta za koje se izrađuje da se u tom mjestu vrši javna rasprava, a ne na način kako je to Predsjednik Savjeta. Ne znam da li je i on bio saučesnik ovoj dvojici koju sam pobrojao.

Nedim Matoruga – Zašto smatram da je ovo rješenje bolje od prethodnog je i iz razloga što je i struka potvrdila da je prethodno rješenje kvalitetnije, ali sa aspekta Breze i Vareša. Dakle sa aspekta komunikacije za Vareš ono rješenje jeste bilo bolje, da onaj koji ide

prema Brezi sa autoputa skrene direktno i dođe do Podžupče. Takvo rješenje puno košta i kompletnu privredu od rampe, naplatnih kućica, prema Stavnji stavlja u drugi plan. To je stvar Općine Ilijaš. Zbog čega smatram da je ovo rješenje puno bolje, nego prethodno to je činjenica da na taj način otvaramo prostor za privredni razvoj. Ne skidamo saobraćaj direktno sa naplatnih kućica i prosljeđujemo ga u Brezu, nego otvaramo prostor, jer saobraćajnica je jednako razvoj, trgovina, privreda i sve ostalo. Na ovaj način imamo nešto duži put prema Brezi, to meni ne smeta. Smetalo bi mi da na uštrb razvoja općine Ilijaš mi nekom skraćujemo puteve. S druge strane to rješenje ne bi nikada bilo izvedeno, iz razloga što tamo imamo veći broj stambenih jedinica i objekata koji bi morali da budu srušeni. U prvobitnom rješenju imate vrlo visoku investiciju. Ko će da napravi most od 200m? Takvo rješenje bi napravilo velike probleme građanima, jer građanima ne bi srušili objekte i ne bi se provelo rješenje. Ovim novim rješenjem stvaraju se preduslovi da objekti koji su već napravljeni budu legalizovani u skladu sa zakonom. To rješava problem našim građanima i ne oštećuje njihov budžet.

Obzirom da nije više bilo prijavljenih za raspravu Zamjenik predsjedavajućeg je zaključio raspravu po tačkama 4. i 5., te dao riječ Općinskom načelniku.

Akif Fazlić – Želim nas podsjetiti da smo neke tri godine se bavili ovim poslom. Da su u ovom poslu učestvovali svi od Zavoda za planiranje, ovdje Službe, građana, da smo imali zaista puno kontakata sa građanima, ne samo oficijelnih kroz javne rasprave, nego i puno neformalnih. Puno sastanaka na kojima smo nastojali da zadovoljimo interese grupacija građana na podjedinim područjima MZ Podlugovi, i da smo kroz te procese, čini mi se uspjeli zadovoljiti većinu zahtjeva koji su se pojavili prije ovakvog konačnog prijedloga Regulacionih planova Podlugovi I i II. Mislim da smo proces doveli do kraja i ne smijemo svojim odlukama ugroziti donošenje ovih planova. Svi smo svjesni da se nisu mogli napraviti regulacioni planovi koji bi na idealan način zadovoljili cjelokupnu teritoriju koju on tretira. Prije svega, rukovodili smo se principom da se zaštite interesi svih građana na ovom području, pa i Općine, a ne područja izvan ove Općine. Prije svega mislim na Brezu i Vareš. Što se tiče provođenja išlo se prije svega sa aspekta sredstava i investicija mogu doći u poziciju da realizujemo te planove, i sa tih aspekata došli smo do jednog rješenja. Prva varijanta je imala određene prednosti, ali kad sve sagledamo i naše interese, ovo je interes Ilijaša, tj. Podlugova. Regulacioni plan se donosi za 10 godina, a onu prethodnu varijantu ne bismo realizovali. Postoji mogućnost i sigurno će se bar najveći dio doći do realizacije, recimo za 5-6 godina Regulacioni plan doći na korekciju, na razmatranje. Ovdje je neko pomenuo, jako je bitno da odkočimo proces u Podlugovima. Mislim da u Službi ima preko 50 zahtjeva koji stoje zbog nedonošenja regulacionog plana. Donošenjem ovih planova otvaramo dolje svaku vrstu zahtjeva građana i u stambenom, privrednom, poljskom smislu. Danas ne bi smjeli imati dileme da se pozitivno izjasnimo povodom ova dva plana.

Zamjenik predsjedavajućeg je stavio na glasanje objedinjene dvije tačke 4. i 5., te je konstatovao da je Općinsko vijeće Ilijaš glasalo na slijedeći način: 16 glasova ZA, 4 PROTIV i 2 UZDRŽANA, nakon čega je Adem Efendić izrazio sumnju u glasanje, te se pristupilo poimeničnom glasanju. Nakon rezultata poimeničnog glasanja Zamjenik predsjedavajućeg je konstatovao da je Općinsko vijeće Ilijaš sa 17 glasova ZA, 4 PROTIV i 2 UZDRŽANA usvojilo

Odluku o

- a) usvajanju Regulacionog plana "Podlugovi I"
- b) provođenju Regulacionog plana "Podlugovi I"

- Odluku o
- a) usvajanju Regulacionog plana "Podlugovi II"
- b) provođenju Regulacionog plana "Podlugovi II"

AD-6

Prijedlog Odluke o pristupanju izradi Regulacionog plana "Alića gaj"

Meliha Avdibegović -obrazloženje - U granicama postojećeg Regulacionog plana koji je na snazi u površini od 14,7 hektara planirana je izrada novog Regulacionog plana uz osnovna usmjerenja za izradu plana navedena u članu 4. Odluke o pristupanju izradi plana. Plan se donosi za period do donošenja novog plana, a planirano je da se završi do 2014. godine. U Odluci su navedene u članu 11. određene parcele iz zabrane građenja, obzirom da smo mi na tom lokalitetu već uradili ažurnu geodetsku podlogu i izvršili geološko-inženjersko ispitivanje terena i po usvajanju koncepta želim da se krene u realizaciju individualnih objekata na predmetnom lokalitetu, a prostor je, za one koji ne znaju, iznad gdje su izgrađene "Šipadove zgrade" i padina iznad zgrada kolektivnog stanovanja. Komisije nisu imale primjedbi.

Obzirom da nije bilo prijavljenih za raspravu po ovoj tački Općinsko vijeće Ilijaš je jednoglasno usvojilo

Odluku o pristupanju izradi Regulacionog plana "Alića gaj"

AD-7

Razmatranje Inicijative Privrednog društva "Misoča" d.o.o. Sarajevo o uvrštavanju eksploatacije industrijske sirovine krečnjaka na eksploatacionom polju "Gornja Misoča" u Izmjenu i dopunu Prostornog plana Kantona Sarajevo

Merima Osmanović -obrazloženje – Privredno društvo Misoča d.o.o. uputila je inicijativu o uvrštavanju eksploatacije industrijske sirovine krečnjaka na eksploatacionom polju "Gornja Misoča" u Izmjenu i dopunu Prostornog plana Kantona Sarajevo. Privredno društvo Misoča d.o.o. je vršilo eksploataciju na bazi privremene saglasnosti Općinskog vijeća za eksploataciju, koja je bila vremenski ograničena. U sklopu Rješenja Federalne uprave za inspeksijske poslove od 2011. godine, koje imate u materijalima, izrečena je zabrana eksploatacije privrednom društvu „Misoča“ d.o.o Sarajevo za izvođenje rudarskih radova na površinskom kopu krečnjaka PK -Zenik u Gornjoj Misoči iz razloga prestanka važenja odobrenja za eksploataciju mineralnih sirovina , a u skladu sa odredbama člana 40. tačka 4. Zakona o rudarstvu FBiH ("Sl. novine FBiH" broj 26/10) odnosno istekom roka za sačinjavanje koncesionog ugovora. Privredno društvo „Misoča“ d.o.o. Sarajevo nije iskoristilo pravo na dodjelu koncesije bez provođenja javnog nadmetanja u skladu sa odredbama člana 35. stav 1 , 2 Zakona o koncesijama Kantona Sarajevo ("Sl. novine KS" broj 27/11, 15/13") pa je u skladu sa odredbama člana 35. stav 4. za dodjelu koncesionog prava na predmetnom kamenolomu potrebno provesti javno nadmetanje za korištenje javnog dobra. Na osnovu ranijih aktivnosti i inicijativa koje se odnose na regularnost eksploatacije u kamenolomu „ Zenik“, OV Ilijaš je 2009. godine pokrenulo proceduru poništavanja saglasnosti o koncesiji za korištenje sirovine krečnjaka na lokaciji „Gornja Misoča“ Općina Ilijaš iz razloga što se ovaj kamenolom nalazi neposrednoj zoni zaštite izvorišta Rijeke Misoča i to otvoreni vodozdvat odakle se veći dio stanovništva općine Ilijaš snabdijeva pitkom vodom. Ovdje posebno treba istaći da je snabdijevanje vodom

općine Ilijaš na prvom mjestu, te je Općina Ilijaš željela zaštititi kao jedino izvorište na kojem se zasniva dugoročno snabdjevanje pitkom vodom stanovništva i privrede. U tom pravcu u poslednjih desetak godina Općina Ilijaš je u skladu sa Zakonom o vodama vodila određene aktivnosti što je rezultiralo donošenjem Odluke Vlade FBiH o zaštiti izvorišta vode za piće Mahmutovića Rijeka i rijeka Misoča i tu Odluku također imate u prilogu.

Slijedom daljnjih aktivnosti OV Ilijaš je 2011. godine usvojilo i slijedeće Zaključke:

1. OV Ilijaš traži od nadležnih federalnih i kantonalnih inspekcijskih organa da hitnim koordiniranim aktivnostima zaustave eksploataciju kamena u kamenolomu Zenik do potpunog ispunjavanja uslova za vršenje eksploatacije.
2. OV Ilijaš traži od ministarstva privrede Kantona Sarajevo da u politici dodjele koncesionih ugovora ima u vidu slijedeće činjenice:
 - ~ kamenolom Zenik nije definisan u prostornom planu
 - ~ lokacija kamenoloma Zenik je tretirana Odlukom o zaštiti vode za piće Mahmutovića Rijeka i Rijeka Misoča
 - ~ lokacija kamenoloma Zenik je vezana za arheološko područje - Stari grad Dubrovnik koji je proglašen nacionalnim spomenikom BiH.

Služba za privredu, finansije i investicije predlaže Općinskom vijeću da usvoji slijedeće Zaključke:

1. OV Ilijaš ne podržava predloženu inicijativu privrednog društva "Misoča" d.o.o. Ilijaš o uvrštavanju eksploatacije industrijske sirovine krečnjaka na eksploatacionom polju "Gornja Misoča" u izmjenju i dopunu Prostornog plana Kantona Sarajevo.

2. Potencijalni investitor "Misoča" d.o.o. Sarajevo može ponovo pokrenuti inicijativu nakon pribavljanja pozitivnih stručnih mišljenja o mogućnosti eksploatacije kamena na lokalitetu Zenik – Misoča od nadležnih institucija:

- Ministarstva privrede Kantona Sarajevo
- Ministarstva prostornog uređenja i zaštite okoliša
- Zavoda za planiranje Kantona Sarajevo
- Komisije/Povjerenstva za očuvanje nacionalnih spomenika Bosne i Hercegovine

Pomenula bih da nam se odazvao predstavnik Komisije/Povjerenstva za očuvanje nacionalnih spomenika Bosne i Hercegovine gosp. Zijad Halilović i ako je potrebno da se i on uključi u raspravu.

Zamjenik predsjedavajućeg – U aktu od 29. 10. 2013. godine dobili ste stručno mišljenje od Zavoda za planiranje Kantona Sarajevo koji je ovu inicijativu ocijenio negativno, koji je rekao: "Imajući u vidu naprijed navedeno, a prema članu 81. Zakona o prostornom uređenju, Zavod je konstatovao da se nisu stekli uslovi za davanje pozitivnog mišljenja." Čuli ste stav Službe, Zavoda. Zamolio bih još kolegu Zijada da nam on obrazloži, a onda ću dati riječ predstavnicima Privrednog društva d.o.o. Misoča ukoliko neko od njih želi nešto da kaže.

Zijad Halilović – Ono što se tražilo od nas je da damo mišljenje povodom ovog dopisa koji je došao na našu adresu, a na temu Privrednog društva Misoča d.o.o. Sarajevo. Moram reći da na području općine Ilijaš imate jednu bogato kulturno-historijsko znamenje. To je Stari grad Dubrovnik. Osim tog dijela koji se odnosi na dispozitiv Odluke, u našoj odluci su navedene i mjere koje se trebaju provesti. U Odluci je navedeno da postoji Odluka iz 1966. Zavoda za zaštitu spomenika Republike Bosne i Hercegovine, da je stavljen pod zaštitu države taj nacionalni spomenik pod rednim brojem 453. Također je navedeno da je 1972. godine Privredno društvo "Misoča" dobilo odobrenje eksploataciju kamenoloma, pod određenim uvjetima, a odnose se na zaštitu ovog prirodnog okruženja. Naša Odluka je objavljena u "Službenom glasniku BiH" 2003. godine, broj 43 i izmjene 48/13.

(Imenovani je zatim na karti pokazao gdje se nalazi nacionalni spomenik i kamenolom.) Moja uloga je da vam prezentiram koja je važnost tog spomenika. Sve do početka 18. stoljeća je bio u funkciji kada ga je napustio posljednji dizdar. Tu imate jedan kontinuitet življenja i ja smatram da to treba zaštititi u svakom pogledu. Što se tiče nekropole i tu je zona zaštite. (Te je i taj spomenik pokazao na karti i detaljnije pojasnio.) Sada sam razgovarao sa gospodom iz Društva, koji su mi dali na uvid rješenja koja su oni dobili '97-'98. godine koja su vezana za dobijanje saglasnosti gdje su naveli da imaju i eksploataciono polje. Ukoliko vi odlučujete o tome kao općinski vijećnici, mogu reći da ako privredno društvo nastoji da dokaže da taj dio koji će se eksploatirati, neće ići u pravcu Grada, što se tiče Komisije, može podnijeti neka inicijativa da se preispitaju nove činjenice koje se nisu imale u momentu donošenja naše Odluke. U momentu donošenja Odluke zabranjene su sve radnje koje će narušiti taj Grad. Također i po pitanju uklanjanja mina sa tog područja, moje je da kažem, a vi odlučite koji su prioriteti Općine. Ja sam na poziciji Saradnika za arheologiju i dobio sam upute šta trebam reći, a sve ću prenijeti svojim nadređenim. Komisija stoji na raspolaganju što bude trebalo. Zahvaljujem se vama i Sanji Zagorac za saradnju pri prenošenju nekropole iz Čevljanovića u Bijambare, koji je bio veliki posao, te se nadam saradnji i u ovom slučaju.

Predstavnik PD "Misoča" d.o.o. - Šefket Gabela – direktor – Naglasio bih da Komisija nije imala, u vrijeme kada je zauzimala stav, adekvatne podatke, a to je karta eksploatacionog polja koja je upisana u katastar FBiH. U zoni eksploatacionog polja nema Starog grada. Mi ćemo iduće nedjelje pokrenuti inicijativu da Komisija svoj stav koriguje, obzirom da preduzeće "Misoča" ne remeti iskopine Starog grada. Naglašavam slijedeće, 1996. godine nakon reintegracije, imaju video snimci kompletne Misoče, šta je ostalo poslije agresora. 1997. godine sva potrebna investiciona dokumentacija je predata Federalnom ministarstvu rudarstva i energetike. Sve nadležne komisije u Federaciji su vršile provjere i dale svoju saglasnost za rad, obavljanje djelatnosti, eksploataciono pravo na 20 godina. Stoga sva legislativa je zadovoljena. 1998. godine i od Općine Ilijaš je dobivena saglasnost za obavljanje registrovane djelatnosti. Priče oko legitimiteta ili legaliteta Misoče d.o.o. su izlišne, jer od 1997. godine posluje legalno i legitimno. U periodu investiranja politika se nije mijesala. 2002. godine kada je Hidrogradnja kao strateški partner došla u Misoču. Saglasnošću Federacije poslovna jedinica Sarajevo puteva je transformisana u Misoču d.o.o. Misoča, ranije kao Sarajevo putevi, egzistira od 1970. godine. Ne postoji od juče i nije tajkunska. U materijalima za Općinsko vijeće od strane službe se daju, po ne znam koji put lažne informacije i podaci koji treba da opet dovedu Općinsko vijeće, da ga dezavuiši i da mu stvore pogrešnu sliku. Sve i jednu vodoprivrednu saglasnost "Misoča" posjeduje od 1972. godine. Stari majdan i stari vodozahvat su dislocirani na područje Novog majdana. Mi smo dostavili na ruke predsjedavajućeg dostavili dio materijala, gdje su sve saglasnosti od Federacije koji su trajni dokumenti, i od Opštine itd, i ranije registar svih papira od 1972. godine. Ovdje se stvara lažna slika. "Misoča" je ispoštovala sve procedure oko koncesije. 2008. godine Odlukom Kantona u službenom listu 21/03 je objavljena Odluka o dodjeli koncesije Misoči d.o.o. 2008. Općinsko vijeće je podržalo dodjelu, da bi 2009. samoinicijativno gospodin Mašić bez ijednog argumenta dezavuisao OV-e da Misoča d.o.o. ugrožava život i zdravlje stanovnika Misoče, odnosno Ilijaša, što je apsolutna laž. Mi smo prošle godine imali sastanak sa Vodostanom i dali argumente da se Vodostan odredi, koji svaki dan vrši mikrobiološku analizu vode, da nam da pismeno da je ugroženo zdravlje stanovnika Ilijaša. On to nije dao, jer nema argumenta za to. Molim OV-e ako danas ne donese pozitivno mišljenje da Misoča nastavi da radi, da nam da malo vremena sa Komisijom za zaštitu spomenika ja se nadam da ćemo iduće nedjelje završiti. Zavod za zaštitu narodnih spomenika nije stavio zabranu "Misoči", niti je problem pitke

vode zabrana "Misoči", nego Federalna inspekcija je stavila privremenu zabranu do donošenja ugovora o koncesiji, koji je nama dat od Vlade Kantona, a koji je osporio gosp. Mašić Nusret sa saradnicima 2009. godine. Imamo ono što je najtragičnije 4-5 godina Opština ne da "Misoči" da radi, u ne znam ime kojih interesa. Vrhunac toga je da danas Hidrogradnja koja je uložila 1,5 miliona maraka u "Misoču". Materijal za kompletan put u Ilijašu je iz Republike Srpske. "Misočin " materijal koji je najkvalitetniji, koja postoji preko 40 godina, ona nije dobro došla na svojoj opštini. Molim vas za razumijevanje, kod nas je 12 ljudi radnika doživjelo moždani udar, srčani udar, koji 4 godine skapavaju od gladi i u užasnoj su psihozi. Molim vas da ne budete protiv razvoja privrede.

Akif Fazlić – Ja želim ovo vrijeme da iskoristim da usmjerim diskusiju, i da ne idemo sa zamjenom teza. Na današnjoj tački dnevnog reda nije poslovanje privrednog društva, već pitanje koncesija. To su dva potpuno razdvojena pitanja. Pitanje poslovanja su pitanja menadžmentu, nadzornom odboru, nadzornim tijelima ove države, ako je bilo nekih problema. Pitanje koncesija je pitanje za ovo Općinsko vijeće, jer je Zakon o koncesijama rekao, da bi dobio koncesiju morate riješiti dva prethodna pitanja. Jedno je saglasnost Općinskog vijeća i drugo da se taj lokalitet nalazi u prostornom planu. U ovom zadnjem periodu nema ni jednog, ni drugog. Pitanje je kako je ovo preduzeće uopće moglo vršiti eksploataciju. Nije ovo vijeće niti Općina zabranili nikom da radi. Pored registracije, morali ste potpisati ugovor o koncesijama da biste mogli vršiti eksploataciju. Vama je rad zabranila Federalna inspekcija. Ja sam u razgovoru sa vama rekao: "Oborite rješenje Federalne inspekcije i dalje radite. Ona je ovlaštena da vam odobri rad, ako radite po zakonu." Inspekcija je nabrojala neke stvari koje vi nemate i ne možete da radite. Druga stvar, pravo koncesije na onom kamenolomu nema niko. Kad se ovdje da prethodna saglasnost to ide na natječaj. Ministarstvo privrede KS će raspisati konkurs i ko ima uslove, a vi sa aspekta države nemate uslove, ja u to neću sada ulaziti, možda ćete sutra imati, idete na konkurs. Želim da Vijeće o svemu ispravno informišemo. Ja sam vam u jednom razgovoru i rekao da se borite za koncesiono pravo, koje možda neko drugi dobiti. Ne smijemo vršiti pritisak na ovo vijeće sa aspekta prava ovog vijeća da odluči o koncesijama, da odluči jel mu preča potpuno zaštićena voda, ili malo ugrožena voda, ili potpuno ugrožena voda. Koncesija je prirodno dobro koje je shodno Evropskoj povelji i lokalnoj samoupravi pravo općinskih vijećnika i oni u ime građana to mogu donijeti. Ne smijemo uslovljavati ih ovakvim ili onakvim stanjima koja su bila. Vama su raniji zakoni omogućili da imate pravo na eksploataciju do 2018. godine. Međutim, u međuvremenu se promijenio pravni sistem, koji je kroz Zakon o koncesijama rekao da svi vi koji imate pravo morate u roku od pet godina bez tendera da napravite ugovor o koncesijama. To vi niste iskoristili. Vi sada idete na tender, ako ispunjavate uslove. To vam je rečeno u Rješenju Federalne inspekcije o rudarstvu. Ne smijemo vijeće opterećivati poslovanjem firme, već da se opredijeli šta je interes općine Ilijaš. I ako se ovo nađe u prostornom planu, potrebna je prethodna suglasnost vijeća. Mi smo predložili u zaključcima da se donesu sva stručna mišljenja ove četiri institucije. Danas smo dobili negativno mišljenje Zavoda za planiranje Kantona. Molim i Komisiju za zaštitu nacionalnih spomenika BiH da se izjasni da li kamenolom zalazi u zaštićenu zonu. Odluka Vlade o zaštiti vodotoka rijeke. Činjenica je da naš vodovod snabdijeva gotovo 20 hiljada građana, te smatram da je to prioritet.

Predstavnik Misoče - replika – Želim da kažem da se vama opet stvara kriva slika o izvoru Mahmutovića rijeke. Član 18. decidno kaže da postojeći privredni subjekti mogu nesmetano da rade. Što se tiče pitke vode sve vodoprivredne saglasnosti postoje od 1972. Svu dokumentaciju su isfinansirali Sarajevo putevi za novi vodozahvat i novi kamenolom.

Zamjenik predsjedavajućeg je otvorio raspravu i pozvao vijećnike ukoliko se neko javlja za riječ da se pridruži diskusiji.

Selver Herić – Počet ću u prvom redu sa neslaganjem vašeg dopisa koji ste uputili predsjedavajućem, koji treba i mora da uvjeri nas da izdejtstvujemo pozitivno mišljenje. Drugo što moram reći, pomenuli ste riječ agresor. Komotno kako ste pisali o bivšem načelniku, danas ga spominjali, možete ga svrstati pod tu riječ. Zamoli bih vas da ovako ozbiljne ljude koje su bile u prošlom sazivu vijeća ne primoravate da nas je mogao dezavuisati jedan načelnik. U tom vijeću je participiralo 11 partija. Neko je sigurno bio protiv. On nije mogao vladati ovim vijećem, stoga se morate izvinuti tim ljudima koji su tada tada djelovali. Što sam pročitao za direktora Mešetovića, ne mogu vjerovati da je ovo izjavio. Čuj da ne smeta. Tako važna funkcija i tako važan privredni subjekt, koji opslužuje više od $\frac{3}{4}$ Općine vodom, da izjavi da taj kamenolom ne smeta vodozahvatu. Pročitali smo da od 1972. imate dokumente, ali vremena se mijenjaju. Ja bih vas pitao, danas niste spomenuli, o dosadašnjem radu radnika. Da li ste vi izmirivali obaveze prema radnicima? Da li su primali plate? Da li im je uplaćivan radni staž, penziono, socijalno? Najbolje bi bilo da vi dostavite ovom vijeću neki izvještaj o radu, finansijski izvještaj, pa da imamo bolju sliku. Da li ste vi firma, koja zaslužuje da vodi tako važan posao i da li ova općina ima nešto od takvih firmi? Koliko znam, slabo. 60 pfeninga je bila cijena po kubiku. Kanton od toga dobije 60%, općina 40. Najbitnije što je mi treba da poštujemo Zavod za planiranje i njihovo mišljenje. Pročitali ste šta u njihovom mišljenju stoji i mislim da treba da se izjasnimo u vezi onog dobra i vode, da zaštitimo i radnike i građane koji na tom području žive.

Zamjenik predsjedavajućeg je zamolio da ne ulaze u raspravu o radnim odnosima već da se drže tačke dnevnog reda.

Adem Efendić – Mi smo kao vijećnici dobili dosta materijala. Priče su da nas neko dezavuiše. Moguće je da ima i tog. Priče su da treba u ovo investirati, a radi se o najkvalitetnijem kamenu krečnjaku na ovom prostoru i šire, i kako ste vi iz preduzeća rekli da se to uvozi iz RS-a. Zaista je i RS sastavni dio BiH i mi to trebamo podržavati, ali ako imamo svoje nešto ovdje trebamo mu dati neku prednost. Mi smo raspravljali u SBB sinoć o tome i imamo stručnjake iz ove oblasti koji su nas uputili da bi trebalo dati saglasnost nekom privrednom društvu, da li "Misoči" ili nekom da radi. Ovaj zaključak koji je ponuđen je dvosmislen. Predlažem da idemo na zaključak 2. da im damo priliku da sakupljaju ponovo sve dozvole i skinu zabranu od inspektora. Ja bih prije dao prednost onima od ranije. Ljudi iz Misoče su za da neku tu radi. Ne bih pričao o radnicima, infraktima i sl. Treba da ljudi rade. Nema smetnji ako kamenolom počne raditi. Mislim da bi trebao početi raditi.

Selver Herić – Ja imam zamjerke na konstataciju poslije moje diskusije. Vjerovatno je Mahir zaboravio da ja nisam član njegove partije. Bio sam jasan, čovjek koji želi da zaštiti vodu, čistoću vode, dobra privredna, Stari grad, a dotakao se PIO/MIO, ako je to greška onda se ja izvinjavam.

Zamjenik predsjedavajućeg je konstatovao da je samo tražio da se drže tačke, ne da je vijećnik Selver Herić nešto pogriješio.

Besim Gljiva – Ja sam vijećnik već 3-4 mandat i učestvovao sam u usvajanju ovih akata koje ste pomenuli, ali nisam izašao da bih o tome pričao. Diskusija o kamenolomu "Misoča" se povlači iz godine u godinu. Lično me taj problem nije nikada doticao, ni

posebno interesovao, ali ovaj put stičem utisak pomno slušajući diskusije, da ovdje na neki način postoje dvije strane. Jedni koji ne daju, drugi koji daju. Što ne mora značiti da je to tako. Ono što ja lično mislim vezano za kamenolome, obzirom da imam iskustvo sa kamenolomima, jer dolazim s gornjeg područja općine gdje egzistiraju dva-tri-četiri kamenoloma, uzimajući u obzir i one na crno, kamenolom, kao i preduzeća tipa Šume, je samo šteta za lokalnu zajednicu. To su preduzeća, grupacije, institucije koje eksploatišu dobra sa lokalne zajednice i vrlo malo vraćaju toj lokalnoj zajednici. Ovdje nije tačka, ali imamo problem gornjeg kraja Općine. Kanton Sarajevo gazduje sa najvećom površinom šuma. Mi nemamo više šume na našem području, eksploatisana je. Mi iz Stranke za Srednje nismo ni kompetentni da o ovom pitanju idemo daleko. Ne znam šta misli o ovome lokalna zajednica i stanovništvo koje živi u neposrednoj blizini kamenoloma. Sve ovo što govorim je iz jednog razloga da pokušamo pomoći tim ljudima iz kamenoloma, bar nekim zaključkom koji će ih uputiti na neki drugi put kojim će ostvariti to svoje pravo. Ovdje predstoje neki dokumenti koji se trebaju pribaviti da bi se krenulo u realizaciju. Ja bih zamolio sve vas da pokušamo naći načina da damo nade tim ljudima. Ponavljam da kamenolom sa svim tim zakonima koje je naš aparat izmislio je veća šteta za lokalnu zajednicu, nego korist, ali mi nismo izabrani da gasimo preduzeća, već da im damo podršku. Ovo iz razloga da u javnosti ne budemo mi krivci, da postoje neke grupacije koje imaju interesa za tim kamenolomom.

Nijaz Rastoder – Ako se sjećamo kada se davala podrška inspektorima 2011 ili 2012., ja sam kao vijećnik i tada bio protiv zaustavljanja i prof. Mašić, a ostali su svi glasali da se zaustavi. Sada sam na fonu kolege Besima da ne prelamamo ništa preko koljena, jer gore smo u to vrijeme 50-tak ljudi ostavili bez takvog-kakvog hljeba. Ne znam je li to uzrok nekih njihovih bolesti, ali sam mišljenja da treba da vratimo na lokalnu zajednicu da, kako je načelnik rekao da ljudi treba da imaju neke saglasnosti. Što kaže predstavnik "Misoče" nisu tajkunska firma, možda bi vam bilo bolje da jeste. Ne biste imali problema.

Općinski načelnik – Akif Fazlić – Da nije bilo ove zadnje rečenice zastupnika Rastodera, ja o firmi ne bih ništa rekao. Pošto je on to kazao, ja želim da se zna precizno kako je firma nastala. Ona nije nastala nikakvom transformacijom Sarajevo puteva, već je osnovano novo društvo sa ograničenom odgovornošću gdje su udjeličari bili Sarajevo putevi, dijelom razni ljudi privatnici, dijelom radnici i nastala je firma i kao takva firma dobila je pravo na eksploataciju mada i tadašnji propisi nisu omogućavali direktan prijenos prava na eksploataciju, ali eto tada je firma dobila pravo bez ikakvih konkursa i ja neću u to da ulazim, ali da se ponovo vratimo na suštinu i evo prijedlog ovih zaključaka. Ovaj drugi zaključak koji smo mi predložili, njime se htjelo da se vijećnici još više upoznaju sa stručnim mišljenjima. Nama ne treba od preduzeća ništa. Ono je samo inicijator. Mi smo mogli bez ovog preduzeća zatražiti stručna mišljenja zavoda, jer se mi ovdje samo opredjeljujemo. Nema preduzeća. Zaboravite ga danas. Mi odlučujemo o prostornom planu i pravu na koncesije. Mi možemo da naložimo službi da pribavi ova četiri mišljenja. Danas ste dobili jedno mišljenje, najmeritornije od ova četiri, i to Zavoda za planiranje. Dobili ste usmeno mišljenje Komisije, a mi ćemo zamoliti da Komisija dostavi i stručno pismeno mišljenje. Ali i kad sva ta mišljenja dobijemo, bez obzira bila sva pozitivna mi smo jedini meritorni da kažemo hoćemo jedan kamenolom ili pet. Sa kamenolomom Vrela ušlo se u jedan proces ne baš zakonski. Kao što je kolega Besim rekao kamenolomi ne donose dobra lokalnoj zajednici, već uništenje ekologije, prirodnog okoliša, saobraćajnica. Naravno moramo imati kamen, nećemo ga uvoziti. Mi smo pred ovih 20 hiljada ljudi odgovorni da kažemo može kamenolom, pa odemo pomalo do ugroženosti. Ovo je vođenje politike upravljanja prirodnim resursima, koje nam je dao Zakon o principima

lokalne samouprave. Nadam se da ćemo uskoro imati još inicijativa za koncesije. Znamo da jedan čitav dio vodotoka prolazi tim prostorom. Privrednom društvu mi ne možemo njima ništa dati. Iako damo saglasnost i usvoji se inicijativa, otvara se put svima da dobiju to pravo.

Zamjenik predsjedavajućeg je zaključio raspravu po ovoj tački dnevnog reda, nakon što je utvrdio da nema prijavljenih za raspravu, te dao na glasanje da li su vijećnici za da ide ova inicijativa u izmjenju i dopunu prostornog plana.

Nakon glasanja zamjenik predsjedavajućeg je konstatovao da obzirom da su samo četiri vijećnika glasala ZA, navedena inicijativa nije dobila potrebnu podršku.

Zamjenik predsjedavajućeg je odlučio da se napravi pauza do 14:15h.

Nakon pauze, predsjedavajući OV-a Ilijaš je konstatovao da postoji kvorum za odlučivanje, te nastavio sa sjednicom vijeća.

AD-8

Prijedlog Odluke o usvajanju Plana zimskog čišćenja puteva na području općine Ilijaš u sezoni 2013/2014. godine

Meliha Avdibegović – Obzirom da je Odlukom o razvrstavanju vangradskih lokalnih cesta na području Kantona Sarajevo("Službene novine Kantona Sarajevo", broj 22/13) došlo je do promjene u obimu radova za period 2013/2014. zimsku sezonu, odnosno povećana je dužina puteva za održavanje, a finansijska sredstva ostala na istom nivou. Služba je izradila: Plan zimskog čišćenja puteva na području općine Ilijaš u sezoni 2013/2014.godine. Operativnim programom radova održavanja puteva i Metodologijom obračuna vrijednosti izvedenih radova koji su sastavni dio ove odluke a radi usaglašavanja potreba za čišćenje snijega na cijelom području općine Ilijaš, prema raspoloživim finansijskim sredstvima.

Navedeni plan je nepromijenjen u odnosu na prethodne godine. Isti je više puta usaglašavan prema zahtjevima mjesnih zajednica, odnosno građana kao i određenih zapažanja izvođača radova i lica koja prate izvođača radova ispred Službe, s tim da su u plan uvrštene lokalne ceste koje su odlukom prenešene na održavanje Općini Ilijaš. Radi se o dionicama ukupne površine 22 370 m. Dionica Gajevi-Dragoradi-Vladajevići, Srednje – Sokolina, Stari Ilijaš i Bioča, koje su uvrštene u redovno održavanje, a put Garaže-Korita i put Sabanci-Raskršće Sudići u održavanje po potrebi. Kroz ovaj plan su predviđeni putevi za čišćenje na dva načina kako i termin kaže, kao redovno i održavanje, odnosno čišćenje snijega po potrebi, a kriteriji koji su se primjenjivali definisani su uredbom o mjerilima i kriterijima za razvrstavanje lokalnih cesta FBiH, odnosno prema značaju putnih pravaca u smislu povezivanja puta sa više naselja, odvijanje autobusnog saobraćaja, broj stanovnika, vrsta saobraćajnice i sl. Operativnim planom radova, koji je u prilogu ove odluke održavanja puteva u zimskom periodu od 15. 11. 2013. do 15. 03. 2014. godine, sačinjenim shodno članu 65. Pravilnika o održavanju javnih cesta FBiH, sadrži mjesto pripravnosti zimske službe, prioritete održavanja, nadzor i kontrola radova i sistem veza, procjenu troškova zimske službe, informisanje o stanju i prohodnost cesta: Zimska služba djeluje od 15. 11. uvođenjem prvog stepena pripravnosti ili ovisno o očekivanim vremenskim uvjetima, a na osnovu vremenskih karakteristika koje će biti dostupne na stranici Federalnog hidrometeorološkog zavoda za grad Ilijaš. Ove godine uvest će se i grad Ilijaš. Upravitelj ceste, u ovom slučaju Općina, donosi Odluku o stepenu pripravnosti od I do IV stepena pripravnosti, koji su navedeni i opisani u Operativnom programu. Ko je

sve obavezan da čisti snijeg definisano je Zakonom o cestama FBiH i Zakonom o komunalnoj čistoći. Do danas u Općini se pokazalo da postoji inertan odnos ostalih učesnika u čišćenju snijega i svi mi imamo takav odnos da smo kompletne te radove prenijeli na Službu, odnosno finansiranje na Općinu Ilijaš.

Stanje i uslovi, kao i obaveze svih nas moraju da se mijenjaju i svi vlasnici objekata, poslovnih, privrednih i stambenih, dužni su i obavezni izvršavati poslove čišćenja snijega. I ove godine ćemo uz inspekciju, kojoj je u nadležnosti čišćenje snijega, sankcionisati one koji ne izvršavaju obavezu.

U prilogu ove odluke je i metodologija obračuna vrijednosti izvedenih radova u zimskoj službi za ovu sezonu i korekcija cijena u odnosu na stvarne meteorološke troškove, koja se primjenjuje na kraju zimske sezone za obračun.

Sa izvođačem radova Općina je sklopila Okvirni sporazum na period od 3 (tri) godine, za period 2012 – 2015. godina, i za svaku sezonu potpisuje se novi ugovor s cijenama iz okvirnog sporazuma. Cijene su definisane po metru dužnom, odnosno metru po satu za radove po potrebi. Komisija za statut i propise imala je primjedbu na član 4. samo u dijelu primjene ove odluke, tako da će stajati: "Ova odluke stupa na snagu narednog dana od dana objavljivanja u "Službenim novinama Kantona Sarajevo"." Mi smo bili stavili da stupa na snagu danom donošenja.

Enes Dizdarević – Gledajući ovaj Plan za održavanje puteva za redovno i potrebi, ja bih zamolio da se pod 36. Regionalni put u Starom Ilijašu R445-veterinarska stanica završava u dužini od 200m, a ovamo na lokalitetu po potrebi pod 16. Veterinarska stanica-naselje uz prugu podvožnjak, da se ovaj dio spoji pod 36. i ovo pod vanrednim potrebama, jer ovaj dio nije predviđeno da se čisti, nećemo čekati da padne snijeg 5m, pa da zovemo da se čisti. Da se ovo pod 36. produži za ovih 500m i da se napravi jedna cjelina, da se napravi jedan krug od džamije do podvožnjaka.

Sead Šehić – Tražio bih da se objasni malo metodologija obračuna vrijednosti izvedenih radova. Gospođa Meliha je rekla da se plaća po metru, ali nije rekla koliko. Tražim da se zaduže predsjednici mjesnih zajednica da se potpišu na naloge, da li je izvođač radova došao na lice mjesta, koliko se tu zadržao i koliko je puta došao tu. I šta ako budu vremenski uslovi povoljni, šta je sa ostatkom sredstava, gdje idu, kako se raspoređuju?

Alan Šerak – U Operativnom programu radova održavanja puteva naveli ste da ste prilikom definisanja putnih pravaca, koji treba da se stave u održavanje cesta rukovodili ste se dosadašnjom praksom zimskog održavanja, tako i primjedbama predsjednika savjeta mjesnih zajednica, građana, kao i mišljenja izvođača radova. Obzirom da ste u trećem stavu nadziranja stavili da predsjednici savjeta mjesnih zajednica mogu kontaktirati izvođača samo preko nadležnog općinskog organa, sumnjam da ste prihvatili sve primjedbe, koje su vam uputili predsjednici mjesnih zajednica. Da dodatno ne obrazlažem ta praksa, je koliko ja znam uvedena prošle godine. Do tada to nije bilo tako. Vidjeli smo kako i šta je bilo u toku zimske sezone lani, kada predsjednici mjesnih zajednica jednostavno nisu imali koga da kontaktiraju. Zvali su određene osobe, ovi im se nisu javljali, nakon 4h su zvali Opštinu, naravno niko nije bio tu, jer ona radi do 4. Prema tome imam prijedlog za predlagača da izbriše ovaj stav i dozvoli predsjednicima mjesnih zajednica da oni kontaktiraju s izvođačem, uz kako je rekao Sead da oni budu nadzor u cijeloj ovoj priči. Ono što mi nije jasno ko određuje prioritete u Operativnom planu kada se tiče održavanja cesta u zimskom periodu. Vi ste ovdje stavili da će Operativni plan napraviti izvođač radova, isti vama dostaviti sa utvrđenim prioritetima. Koliko ja znam nadležnost održavanja lokalnih cesta, prema Zakonu o javnim cestama FBiH decidno kaže

da naručilac radova definiše prioritete. Što je sasvim logično. Mi smo ti koji naručujemo održavanje puteva u zimskom periodu i treba da kažemo koje putne pravce želimo da čistimo, koje prioritete, koje putne pravce želimo da budu prohodni nakon određenog vremenskog perioda definisano prioritetima. Prema tome, meni je logično, a i zakonski vrlo jasno da je Općina ta koja je trebala da definiše prioritete, a ne izvođač radova. Prema ovome što vidim prema ovoj priči, ispade da mi štitimo izvođača radova. Vjerovatno je čovjek imao primjedbi lani, odnosno prije dvije godine, kada su ga svi oni predsjednici mjesnih zajednica zvali. Znam iz ličnih primjera. I mi smo kao preduzeće slali neke dopise prema vama, jer nismo mogli da vršimo redovnu funkciju koja nam je zakonski pripala. Zamolit ću vas da ove moje prijedloge prihvatite i da onda izglasamo Odluku o usvajanju Plana zimskog čišćenja puteva na području općine Ilijaš.

Muhamed Handžić – Razmatrajući ovu odluku uočio sam nekoliko bitnih stvari koje meni olakšavaju, kao predsjedniku mjesne zajednice posao. Ovo što je kolega Alan maloprije rekao da mi nemamo pravo da kontaktiramo sa izvođačem radova. To je uveliko nama olakšanje. Ja nemam pravo kontaktirati izvođača radova, s tim da od općinske službe tražim da putevi po prioritetima kako je poslagano budu čisti i prohodni za motorna vozila i građane. Ja znam na koji način ću ovo provesti sve. Ovdje meni ne treba puno pameti. Ja ću ostaviti broj telefona gospodina iz nadležne općinske službe, na svaku banderu zalijepim i neka ga zovu građani ako nije čisto. Mene neće zvati sigurno. Ja sam prošle godine imao ovih problema sa izvođačem radova i ja sam pisao i dopise, radio sam svašta, međutim ništa se nije uvažilo. Radi se o sljedećem da ne bude da samo paušalno iznosimo neke informacije. Nisam siguran da će firma koja je dobila zimsko održavanje puteva od značaja za općinu Ilijaš imati toliko tehničkih kapaciteta da odgovori ovim zadatim uslovima. Ovdje vidimo da je potrebno za redovno održavanje puteva 144,3 km dužna redovnog održavanja i 108 vanrednog. To je ukupno 252km i 3 m. Ja znam odprilike sa čim raspolaže ova firma, kojim motornim vozilima i kojeg kapaciteta. Mi smo imali problema da nam nisu mogli očistiti put po 15-20 dana i da nismo mogli izaći tamo gdje nam je vrlo bitno iz razloga što nemaju odgovarajuće mehanizacije. Ova firma koja redovno dobija na tenderu ovaj posao zimskog održavanja, nemam ja ništa protiv njih, naprotiv više volim da neka naša firma dobije posao nego iz Vogošće, Breze itd, ali moramo natjerati vlasnika ove firme da pripremi mehanizaciju da može odgovoriti onim poslovima koje je uzeo. Dalje, slažem se sa kolegom koji je predložio da predsjednici savjeta mjesnih zajednica potpišu nalog da je taj došao u MZ i čistio određenu dionicu. Što? Oni ne izađu na određene dijelove, a ovdje piše bio je on tu. Podržat ću ovu odluku ukoliko mi se obeća da će mehanizacija od ovog vlasnika biti postrojena i pregledana da li je operativna za zimsko održavanje puteva.

Selver Herić – Nadovezat ću se malo na diskusiju prethodnika, kada su u pitanju predsjednici mjesnih zajednica. Mislím da bi dobro bilo da budu ono što jesu, ali u okviru ovog Operativnog plana. Sve što iziskuje naknadno kontaktirati načelnika, službu da bi se odobrilo ono što je potrebno. U okviru ovog Operativnog plana treba da šefovi tih područja i kontaktiraju. Imam malo zamjerki na tabelarni prikaz, ako može pomoćnica da to stavi na papir. Put za redovno održavanje Put za Velike Šume molio bih da se čisti do zadnje kuće, a ne napola, pa se onda vrati. To je još 300m, a gore još dvije kuće moraju još očistiti. Koliko znam da postoji samo jedno selo Gojanovići. Ne može biti i po redovnom i po potrebi. Ovo po potrebi da izbacite Gojanoviće. Zaboravili ste granice opštine ili ne znate granice opštine Ilijaš, koliko vidim, a vjerovatno da dosta i ne zna, pa tako za čišćenje snijega po potrebi, molio bih da se uvrsti naselje Klek, Visojevica, Luka, Žorci. Tamo imate 11 povratnika. Zaboravili ste sela njihova. Dalje, Podrola-Frgaj-Gornji Čevljanovići

definišite da se očisti naselje Frgaj, a ne ispod Frgaja prođe čistač i ode u Gornje Čevljanoviće, a za Frgaj ne izlazi nikako.

Nedim Matoruga – Mislim da ovaj Plan održavanja puteva u zimskom periodu, odnosno metodologija, način na koji je ovo predloženo je po meni uredu. Imajući u vidu da se ne kontaktiraju direktno od predsjednika mjesnih zajednica izvođači. Ja bih kao predsjednik MZ to podržao, nisam predsjednik, a kao i građanin. Mislim da je uredu. Imamo obavezu općinskog organa da obezbijedi broj koji će biti dostupan 24h. Nebitno ko je s druge strane, ali neko se mora javiti u bilo kom momentu dana i noći. Što se toga tiče imamo rješenje koje po meni spriječava mogućnost manipulacija. Kad sa svih strana zovu izvođača, on ima opravdanje kaže zvali su me ljudi. Ovako ide kroz općinski organ uprave i to mi je uredu. Ja bih predložio radi transparentnosti, obzirom da se isključuju predsjednici MZ kroz ovaj plan, da se Općinsko vijeće informiše svaki mjesec. Svaku sjednicu OV-a, o konkretnim aktivnostima izvedenim u prethodnih 30 dana na terenu, tako da nema potrebe da vi na terenu glumite policajca. Jel on bio, nije bio, to će biti na izvještaju. Ako on u izvještaju kaže da je izašao tri puta u neko gore selo, vi znate je li on izašao ili nije, odnosno vi ćete svakako voditi svoj dnevnik. Po meni je to prijedlog da bude u ovom planu. Na taj način će se spriječiti neke osnovane i neosnovane priče na račun izvođača, Općine, bilo koga. Ne vidim transparentniji način da se to odradi.

Selver Herić -krivi navod- Očito da ovdje neko nije ni transparentno ni rođen. Da on raspravlja mjesečno čišćenje, a snijeg pada metar i moramo čekati mjesec da bi naš Nedim raspravljao kako će se čistiti. Morate se preispitati. Morate dati ovlasti MZ koje ima. Šeta što vi niste predsjednik, ali ako vas mještani ne vole, vole neko žensko da biraju, šta vam ja mogu. Predsjednici normalno po Operativnom planu treba da se pitaju i zovu. Oni najbolje znaju. Sad ćeš ti znati ima li snijega na Kleku ili nema. To mi je nenormalno.

Nedim Matoruga -krivi navod- Nisam namjeravao da ulazim ovdje u lične obračune sa kolegom. Ne znam jeste li vi mene slušali. Ovdje dakle nije niko rekao da neko izbacuje predsjednike mjesnih zajednica iz bilo čega, već jednostavno da predsjednici MZ imaju umjesto izvođača, općinski organ s druge strane koji će odgovarati svim njihovim pozivima.

Alan Šerak – Cijela ova priča vezana za nadležnosti i nenadležnosti predsjednika MZ-a po meni tu nema ništa sporno. To je inače praksa u cijelom Kantonu Sarajevo. Predsjednici MZ zovu izvođače radova, kako na Grbavici, tako u Starom Gradu i na sve i jednom pedlju općine, odnosno Kantona Sarajevo, duž cijele njegove granice. Prema tome, ne vidim razloga uvrstiti ovo, dozvolite ljudima da se pitaju. Na kraju krajeva, građani su ih birali za rješavanje određenih problema i ovo je isto jedan način gdje treba da se pitaju prije svega predsjednici MZ-a, zajedno sa svojim savjetom. Zaboravio sam maloprije napomenuti još jedan prijedlog, više nego osnovan, a tiče se parkinga i trotoara koji se redovno održavaju po kvadratnom metru. Ovdje ste stavili Ilijaš parking kod zgrade Opštine. Stavili ste Ilijaš parking kod Doma zdravlja Ilijaš. Zamoliću vas da mi pojasnite o kojem se parkingu radi. O njihovom ličnom parkingu ili onom preko puta, gradskom. Stavili ste da ćete čistiti trotoar u Ulici Žrtava genocida u Srebrenici. Ja bih ovdje još dodao jedan trotoar, a to jest od Osnovne škole pored nove stambene zgrade, koja je u toku izgradnje i dole do saobraćajnice koja vodi prema Mrakovu. To je više nego osnovano. Postoji potreba da se i taj trotoar čisti. Znamo da nedjeljom ljudi idu u crkvu na misu, a znamo da djeca iz Osnovne škole idu pješke do Novog naselja, iznad stadiona. Ostalo se svakako čisti. To je u nadležnosti Direkcija za ceste Kantona Sarajevo.

Akif Bešlija – Kada je u pitanju ovaj plan, ja imam samo nekoliko zahtjeva za korekcijama nadležnoj službi. Na redovnom održavanju pod stavkom 81. Put za Bibiće-Gaj da produže gore do Balte, pored spomen česme. Ne radi se o velikoj dužini. Kada je u pitanju čišćenje po potrebi samo da se produži kružni tok kroz Solakoviće pod 29. Produžiti gore do zadnjeg naselja Kruške. Također da se uvrsti prilazni put od Žrtava genocida u Srebrenici do džamije u Podlugovima. Ne znam koji su uslovi bili općenito da se stavljaju neka naselja u čišćenje, da li po potrebi ili redovno održavanje, ali evo neka bude to po potrebi. U Mrakovu znate da se naselilo malo više stanovnika, a da bar nisu obuhvaćeni ovim održavanjem po potrebi, stoga predlažem da uđe Mrakovo, Naselje Pavlovići, Mrakovo dole oko džamije prema Dolu i Mrakovo Bara. To je otprilike 20-30 stambenih objekata i mislim da ima za potrebu da se tim ljudima obezbijedi čišćenje snijega bar po potrebi.

Predsjedavajući OV-a – U skladu sa Zakonom o javnim nabavkama ukoliko je vrijednost veća od 60 hiljada, mislim da se mora svake godine raspisati javni tender. To bi me zanimalo kako se može ići u direktni sporazum.

Općinski načelnik Akif Fazlić – Ja moram reći da sam zadovoljan raspravom. Rasprava je pokazala da je ponuđen jako dobar dokument. Ovo što jesu primjedbe, odnose se praktično na provedbu ovog dokumenta. Ovdje je ključno pitanje kakva je pozicija predsjednika savjeta MZ-a. Mi smo imali i jednu i drugu praksu. Nama je lakše da se uključe predsjednici savjeta MZ-a, a mislim da je ozbiljniji i odgovorniji ovaj pristup koji se nudi, gdje opštinska služba u potpunosti odgovara i ne može reći kriv je ovaj ili onaj predsjednik MZ-e. Ovo kad pričamo o uključenju predsjednika, ovo što je Selver rekao, oni se mogu uključiti samo pod uslovima kako je on to i rekao. Učešće u okviru programa kakav mi donesemo. Ovdje se znači niko ništa ne pita. Mi danas donosimo dokument i taj se samo dokument pita. Po tom dokumentu moraju svi raditi i po tom dokumentu mi sad možemo o njgovoj implementaciji reći ko su ti svi koji učestvuju u njegovoj provedbi. Ako je zaista opšta procjena da će njegova bolja provedba biti da su tu predsjednici savjeta u okviru ovakvog dokumenta, a ne da oni mogu nešto izvan njega, možemo mi prihvatiti i to. Ili cijenimo da je ovo profesionalnije, a ja mislim da jest, da ostane ovo rješenje. S obzirom na budžet i onog što nam je dato u teret da prihvatamo ovaj program, koji je ponuđen vezano za linije i vezano za razvrstavanje za redovno održavanje i održavanje po potrebi, čini mi se da se tu prilično slažemo, a kada su u pitanju prioriteti, sve ove godine se čistilo sa aspekta prioriteta. Puno bolje i efikasnije nego da su utvrđeni I, II, III, pa za 72h. To kad krene čišćenje sa aspekta vremena prije se očisti nego kako je to definisano ovim prioritetima. Kada je u pitanju izbor izvođača jasno je po Zakonu o javnim nabavkama, gdje se regulišu postupci shodno vrijednosnim razredima. Shodno vrijednosnim razredima iznad 80 hiljada bez PDV-a mora biti otvoreni postupak, a ovo je taj posao i taj otvoreni postupak podrazumijeva javni poziv, s tim što taj otvoreni postupak može imati i ovaj način koji se zove Okvirni sporazum, ako jedna vrsta usluge se ponavlja iz godine u godinu, može se shodno dokumentima koji finansijski tretiraju period, a to je tri godine, može se raspisati tender za tri godine i ovo je najtransparentniji način izbora koji je izvršen. Ovdje još je dat prijedlog. Muhamed Handžić dao je pravu stvar, da Služba završi jeste da se prije početka sezone definiše oprema koja je i tada uslovima tendera postavljena i da se izvođač ozbiljno pripremi sa aspekta potrebne opreme da ovu vrstu posla može efikasno raditi.

Predsjednik Savjeta Mjesne zajednice Podlugovi – Ukratko sam pročitao lokalni putevi redovno održavanje i mislim da je tu možda napravljen jedan lapsus, zaboravljen je Put raskršće u Podlugovima kod katoličkog groblja za "Dolinu mumijevih", s obzirom da je on

sada asfaltiran trebalo bi ga redovno održavati i da bi se postavili kontejneri. On sada nije uvršten ni u jedan rang održavanja, ni povremeno, ni redovno.

Predsjedavajući zaključuje raspravu po ovoj tački, te pita predlagača da li će uvažiti primjedbe i prijedloge.

Nakon što je predlagač prihvatio primjedbe i prijedloge Općinsko vijeće je jednoglasno usvojilo

Odluku o usvajanju Plana zimskog čišćenja puteva na području općine Ilijaš
u sezoni 2013/2014. godine

AD-9

Prijedlog Odluke o utvrđivanju novog građevinskog zemljišta i plana parcelacije za
izgradnju apartmanskog naselja Ljubnići

AD-10

Prijedlog Odluke o utvrđivanju novog građevinskog zemljišta i plana parcelacije za
izgradnju apartmanskog naselja Bioča Faza I

Po prijedlogu predlagača OV-e je jednoglasno usvojilo zaključak da se tačke 9. i 10. spoje kada je u pitanju obrazloženje i rasprava, a da se pojedinačno usvajaju.

Meliha Avdibegović -obrazloženje- Kao što smo najavili prošle ili pretprošle sjednice da ćemo u narednom periodu imati zahtjeva za utvrđivanje novog građevinskog zemljišta. Danas imamo dvije tačke, odnosno Odluke o utvrđivanju novog građevinskog zemljišta za lokalitet Bioča I i Ljubnići, na kojima se planira izgradnja apartmanskih naselja. Što se tiče Bioče površina novog građevinskog zemljišta je u površini cca 87 ha, a odnosi se samo na prvu fazu realizacije, na dijelu gdje su budući investitori riješili imovinske odnose i na kojima je sad to zemljište u njihovom vlasništvu. Na nekoj od narednih sjednica vjerovatno ćemo imati i Odluku o utvrđivanju novog građevinskog zemljišta Bioča II. Od zadate ove površine ukupno 48 900m² se odnosi na površinu naselja, odnosno 263 parcele površine 1000-1500m² i 263 objekta, te saobraćajnice 38 000m², 5m širine i 1m trotoara.

Što se tiče lokaliteta Ljubnići površina je oko 13ha. Površina naselja je 73 800m², odnosno 108 parcela površine 1000-1500m² i 108 individualnih stambenih objekata. Površina saobraćajnica oko 10 000, zonu društvenih sadržaja i zonu sporta i rekreacije. U oba obuhvata predviđena su tri tipa objekata površine 150-200m², visine max dvije etaže i oblikovanih u dva stila, kao tradicionalno bosanska kuća i tip kuće modernijeg izražajnog stila. Kompleksi će se vezati na postojeću infrastrukturu, odnosno sve prema uslovima nadležnih infrastrukturnih preduzeća.

Komisije nisu imale primjedbi na ove odluke.

Muhamed Handžić – Ovo su zaista impozantni podaci koje je iznijela pomoćnica načelnika i meni je drago da se nešto gradi, da idemo, ja bih rekao naprijed. Međutim, ovdje ima nekih nejasnoća pa ne znam da li su i samoj pomoćnici jasni i načelniku, pa da nam malo pojašne to. Radi se o slijedećem tip objekata, veličina, dužina, prostor na kojem će se graditi dobili smo ovdje sve. Međutim nije mi jasno ko je investitor. Ko gradi te objekte? I kakva će svrha biti tih objekata? Da li će to biti imigracioni centri? Da li će biti izbjeglički centri? To nimalo nije smiješno. Ovim se trebamo pozabaviti. Može se desiti da sutra imamo još 10 hiljada novih stanovnika u općini Ilijaš. Na ta pitanja ja želim odgovor. Naravno da sam za izgradnju, naravno da sam za to da se u mojoj mjesnoj zajednici dešavaju pozitivne stvari, ali dajte da vidimo u kom pravcu to ide. Mi to ne znamo.

Nijaz Rastoder – I mene također muče ista pitanja kao i kolegu Handžića. Međutim, ako se pozabavimo strukturom stanovništva, vidjet ćemo da bošnjaka fali 3 miliona da bi imali normalnu i ozbiljnu državu. Ko ovdje dolazi? Evropa je otvorena za useljavanje. Ljudi dolaze sa svih strana, ali u Zapadnoj Evropi kada dođete vi se morate asimilirati. Možete zadržati samo svoju vjeru i nacionalnost iz koje države dolazite. Šta ćemo mi ovdje dobiti? Zaista ne znamo. Ako ćemo praviti ovakva naselja, ja bih vas zamolio da ih damo imena Maoča I, II i III. Ja neću glasati kao i prvi put. Tu sam oprezan, jer zaista ne znam ko je investitor. Niko tu ne dolazi ni sa jednim privrednim objektom, samo neka turistička naselja. Ne znam za šta se ljudi vežu. Imamo jednu pećinu i pola ljudi ne zna gdje je. Drugo, kada neki siromah iz sela hoće da se sin odvoji od njega, mi mu ne možemo napraviti tu građevinsku pogodnost da on na tom poljoprivrednom zemljištu napravi kuću, a ovdje sad imamo ingerencije i to mi pomalo nije jasno, taj zakon.

Općinski načelnik Akif Fazlić – Samo da razjasnimo ovo zadnje, tehničko. Odluka o provođenju prostornog plana omogućava gradnju novih naselja, ako definišemo to novo građevinsko zemljište. Nema pojedinačno. To je pravni osnov. Pravni osnov je za ovo je Odluka o provođenju prostornog plana Kantona Sarajevo. Kada je u pitanju ovaj aspekt o kojem govorimo, ja bih sve vas zamolio da puno ozbiljnije pričamo o tome. Ovdje se radi o imidžu ove opštine. Ovdje se radi o stvaranju uslova da opština Ilijaš privuče strane investicije. Ovdje se radi i svemu višem, nego što smo to ovako ležerno prihvatili, da ispod nekog nivoa pričamo o ozbiljnosti. Ovdje je jasno. To sam ja prošli put rekao kada je bilo vezano za naselje Popovići, da se radi o investitorima iz Kuvajta, da se radi o čisto profitabilnim investicijama, koje su investicije u nekretnine. Arapski svijet još uvijek neće da ulaže u privredu, neće ni u turizam. Ulaže samo u nekretnine. Ovo su projekti u investicionom smislu, u poslovnom, u biznis smislu vezani za gradnju i promet nekretnina. Sve te nekretnine koje će ovi investitori koji su kupili zemlju, koji će uložiti u plaćanje dozvola za građenje infrastrukture i objekata će biti na tržištu, prije svega klijentima iz Kuvajta i zaliva. To je klijentela. Ja ću malo slobodnije pričati. Ja sam razgovarao sa njima o puno povoljnijim lokacijama za gradnju u naseljima. Ljudi neće taj tip naselja. Prevažodno ih interesuje sve što je uz vodu, ako ima uz rijeku Bosnu, platit će pošto god hoćete. Interesuje ih ovo što je vezano čisto za prirodu, jer se radi o naseljima koje će oni kao klijentela koristiti 2-3 mjeseca u godini i da li će ga rentati ili neće to je njihova stvar. Ja ću prihvatiti da postoji bojazan da to može biti i nešto drugo. Međutim, ovdje su ljudi privatne investicije. Ako neko misli da će neko graditi nešto što mi se bojim. Ja mislim da nema neko ko će svoje pare dati za to. Činjenica je da u zadnjih dvije godine na području Kantona Sarajevo, prevažodno od Ilidže, Hadžića i Ilijaša jako je posjećeno i jako se puno traži lokacija i tih lokacija je postalo i malo na ovom kantonu, već se prešlo i u Brezu i u Visoko, pa mislim i već u neke druge dijelove BIH. Ja od vas tražim da sa više uvažavanja ovu problematiku razmatramo. Nama gradnja tih naselja, dolazak i boravak tih ljudi može činiti samo progres, u investiranju i u potrošnji. To su dva ključna ekonomska parametra koji i daju zamajac razvoju. Uz svu bojazan, koju ću i prihvatiti da treba malo i o tome misliti i treba ograničiti naše resurse, da gledamo ovo sa neke ozbiljnije i profesionalnije strane.

Obzirom da više nije bilo prijavljenih za raspravu Općinsko vijeće je sa 16 glasova ZA, 1 protiv, 3 uzdržana usvojilo

Odluku o utvrđivanju novog građevinskog zemljišta i plana parcelacije za izgradnju apartmanskog naselja Ljubnići

te također sa 16 glasova ZA, 1 PROTIV, 3 UZDRŽANA usvojilo

Odluku o utvrđivanju novog građevinskog zemljišta i plana parcelacije za izgradnju apartmanskog naselja Bioča Faza I

AD-11

Prijedlog Odluke o organizovanju i funkcioniranju zaštite od požara i vatrogastva na području općine Ilijaš

Obzirom da nije bilo prijavljenih za raspravu po ovoj tački dnevnog reda Općinsko vijeće Ilijaš je jednoglasno usvojilo

Odluku o organizovanju i funkcioniranju zaštite od požara i vatrogastva na području općine Ilijaš

AD-12

Prijedlog Odluke o prestanku statusa nepokretnosti u općoj upotrebi

Kako nije bilo prijavljenih za raspravu po ovoj tački dnevnog reda Općinsko vijeće Ilijaš je odmah prešlo na glasanje, te jednoglasno usvojilo

Odluku o prestanku statusa nepokretnosti u općoj upotrebi

AD-13

Prijedlog Odluke o odobravanju prodaje motornog vozila

Kako nije bilo prijavljenih za raspravu po ovoj tački dnevnog reda Općinsko vijeće Ilijaš je odmah prešlo na glasanje, te jednoglasno usvojilo

Odluku o odobravanju prodaje motornog vozila

AD-14

Prijedlog Saglasnosti za kandidovanje projekta zatvorene i otvorene tržnice "Ilijaš" Fondaciji OdRaz u Sarajevu u svrhu obezbjeđenja dijela sredstava za izgradnju objekta

Općinski načelnik Akif Fazlić – Po procedurama vladine fondacije OdRaz, da bi jedan projekat ušao na njihovu listu potrebna je prethodna saglasnost Općinskog vijeća i mi sve više nastojimo da što više projekata imamo u OdRazu, kako bi neki od njih došao na red za sufinansiranje i predložimo tržnicu kao jedan od prioritetnih projekata, a koji smo stavili u prioritet u 2013. godini. Nažalost zbog nedostatka sredstava nismo ga mogli realizirati i nastojimo kroz ovaj vid preko Fondacije OdRaz, da obezbijedimo dodatna sredstva i da taj projekat završimo u 2014. godini. Dakle, preduslov prihvatanja projekta jeste saglasnost Općinskog vijeća.

Predsjedavajući OV-a Ilijaš – Molim vas da znamo tačan lokalitet tržnice i da li je izvršena korekcija o kojoj smo razgovarali.

Općinski načelnik Akif Fazlić – Mi smo dobili prijedlog i mišljenje Zavoda za planiranje za korekciju, a nismo je do kraja definisali. Prijedlog lokacije je pored Binga.

Kako nije bilo prijavljenih za raspravu po ovoj tački dnevnog reda Općinsko vijeće Ilijaš je odmah prešlo na glasanje, te je sa 18 glasova ZA, 3 PROTIV dalo

Saglasnosti za kandidovanje projekta zatvorene i otvorene tržnice "Ilijaš" Fondaciji OdRaz u Sarajevu u svrhu obezbjeđenja dijela sredstava za izgradnju objekta

AD-15

Prijedlog rješenja iz imovinsko-pravne oblasti:

- a) broj 06/1-31-3734/12 od 15.08.2013.godine
- b) broj 06/1-31-2955/13 od 21.10.2013.godine
- c) broj 06/1-31-2956/13 od 21.10.2013.godine

Sadeta Brkić -obrazloženje- Rješenje pod a) – Rješavajući po imovinsko-pravne odnose po zahtjevu Šehović Redže, a nakon izdate naknadne urbanističke saglasnosti za izgradnju stambeno-poslovnog objekta, služba je primjenom člana 61. Zakona o građevinskom zemljištu predložila predmetno rješenje. Naime, vama je to već poznato kako član 61. Zakona o građevinskom zemljištu je odredio da će Općinsko vijeće na građevinskom zemljištu u državnom vlasništvu na kojem je izgrađena zgrada bez prava korištenja radi građenja, za koju se može naknadno izdati odobrenje za građenje utvrditi pravo vlasništva u korist graditelja uz obavezu plaćanja naknade, kao i rente. 08. 10. 2013. godine stiglo nam je i pozitivno mišljenje Pravobranilaštva KS, kojim je konstatovano da je predmetna dodjela u cjelini u saglasnosti sa članom 61. Zakona o građevinskom zemljištu. Rješenje pod b) – U pitanju je dodjela neizgrađenog gradskog građevinskog zemljišta, radi dogradnje poslovnog prostora, predviđeno u čl. 16. i 45. Zakona o građevinskom zemljištu nakon raspisanog konkursa za dodjelu neizgrađenog gradskog građevinskog zemljišta u svrhu dogradnje već postojećeg poslovnog objekta, u smislu člana 46. Zakona o građevinskom zemljištu i zaključkom konkursne komisije od 29. 07. 2013. godine, utvrđeno je da je stigla jedna prijava i to predmetna na prilogu u Ulici 126. Ilijaške brigade. Također, 03. 10. 2013. godine je stiglo pozitivno mišljenje Pravobranilaštva, što znači da je predmetno rješenje u cjelini urađeno u skladu sa čl. 16. i 45. Zakona o građevinskom zemljištu.

Rješenje pod c) – Također dodjela u skladu sa čl. 16. i 45. Zakona o građevinskom zemljištu identičan pravni osnov kao i prethodno rješenje, gdje također postoji pozitivno mišljenje Pravobranilaštva, da je predmetna dodjela u cjelini u skladu sa čl. 16. i 45. Zakona o građevinskom zemljištu.

Kako nije bilo prijavljenih za raspravu po ovoj tački dnevnog reda, Predsjedavajući OV-a je predložio da se vijećnici izjašnjavaju zajedno za sva tri prijedloga rješenja, što je i usvojeno sa 15 glasova ZA, te je Općinsko vijeće Ilijaš sa 19 glasova ZA i 2 glasa PROTIV usvojilo

Rješenja iz imovinsko-pravne oblasti:

- a) broj 06/1-31-3734/12 od 15.08.2013.godine
- b) broj 06/1-31-2955/13 od 21.10.2013.godine
- c) broj 06/1-31-2956/13 od 21.10.2013.godine

AD-16

Informacija o stanju privrede i samostalnog privređivanja

Kako nije bilo prijavljenih za raspravu po ovoj tački dnevnog reda, Predsjedavajući OV-a je konstatovao da je primljena k znanju

Informacija o stanju privrede i samostalnog privređivanja

AD-17

Informacija o uspjehu i odgoju učenika u osnovnim i srednjim školama na području općine Ilijaš u školskoj 2012/2013. godini

Kako nije bilo prijavljenih za raspravu po ovoj tački dnevnog reda, Predsjedavajući OV-a je konstatovao da je primljena k znanju

Informacija o uspjehu i odgoju učenika u osnovnim i srednjim školama na području općine Ilijaš u školskoj 2012/2013. godini

AD-18

Prijedlog Odluke o izmjeni Odluke o visini naknada vijećnicima, članovima stalnih i povremenih radnih tijela Općinskog vijeća Ilijaš

Općinski načelnik Akif Fazlić -obrazloženje- Oficijelni predlagač ove tačke je Komisija za budžet, ali obzirom da sam ja u obrazloženju Budžeta, kada sam obrazlagao pitanja osnovica nagovijestio i praktično dobio od vas pristanak da idemo i na usklađivanje vijećničkih naknada, kada su u pitanju ove četiri prigradske opštine, rezultat toga je usklađivanje, mada sa zakašnjenjem. Ovo povećanje od 50KM jeste jedna vrsta usklađivanja i zbog javnosti hoću kazati da su Hadžići najniži 290, Ilijaš drugi odzada 300 i onda ide dalje 350. Shodno Budžetu i svim parametrima cijenimo da u ovom trenutku je ovo usklađivanje adekvatno toj situaciji i u ime Komisije za budžet predlažem da ovaku odluku prihvatite.

Kako nije bilo prijavljenih za raspravu po ovoj tački dnevnog reda Općinsko vijeće Ilijaš je odmah prešlo na glasanje, te je sa 15 glasova ZA, 2 PROTIV i 1 UZDRŽANIM usvojilo

Odluku o izmjeni Odluke o visini naknada vijećnicima, članovima stalnih i povremenih radnih tijela Općinskog vijeća Ilijaš

Predsjedavajući je konstatovao da je iscrpljen dnevni red, te je zaključio 12. sjednicu OV-a u 15:45h.

Zapisničar:
Maida Habibović

PREDSJEDAVAJUĆI
OPĆINSKOG VIJEĆA ILIJAŠ
Damir Filipović, s.r.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-698, fax. 400-505,
Transakcijski račun kod VAKUFSKE BANKE,d.d. Sarajevo:1602000000710645
e-mail ov_ilijas@bih.net.ba

